



ಸ್ವಂತ ಪ್ರಸಾರಕ್ಕಾಯಿತ್

ಬೆಂಗಳೂರ್ ಕೊಡವ ಸಮಾಜತ್ ಪತ್ರಿಕೆ

# ಪೊಂಬೊಳಕ್

Pombolak Kodava Quarterly ಕೊಡವಾಮೆರ ಬೊಳಚ್

ಸಂಪುಟ : 13

ಸಂಚಿಕೆ : 3

ನವಂಬರ್ 2015-ಜನವರಿ 2016

ಪೊಂಬೊಳಕ್ - ಮೂತಿಂಗ ಪತ್ರಿಕೆ

ಕೊಡವ ಸಮಾಜ, ಬೆಂಗಳೂರ್  
ಕ್ರಯ: 12 ಉರ್‌ಪಿಯೆ

## ಬೆಂಗಳೂರ್ ಕೊಡವ ಸಮಾಜತ್ ಪುತ್ತರಿ ನಮ್ಮೆ



ಬೆಂಗಳೂರ್ ಕೊಡವ ಸಮಾಜತ್ ತಾ. 26-11-2015ಂದ್ ಬೈಟಾಪಕ ಪದ್ಧತಿ ಪೋಲೆ ಪುತ್ತರಿ ನಮ್ಮೆ ನಡಂದತ್. ಸಮಾಜ ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪ ಅಯಿಂಡ ಮುಂದಾಳ್ತನತ್ ನಡಂದ ಪುತ್ತರಿಲ್ ಈಡ್ ಎಡ್ಡಿತ್ ನಾಡೆ ಕಾಕಿತ್, ಕೋಲ್‌ಪೊಜ್ಜತ್, ಕದ್ ಎಡ್ಡಿತ್ ಎಲ್ಲಾರ್‌ಕೂ ಕದ್ ಕೊಡತತ್. ಪುತ್ತರಿ ಕಳ್‌ಂಜಿ, ತಂಬುಟ್ತ್ಯೆ ಫಲಾರ ಬಳ್‌ಂಬ್‌ಚಿ. ಈ ಸಂದರ್ಭತ್ ವಿದ್ಯಾನಿಧಿರ ಸ್ಕಾಲರ್‌ಶಿಫ್‌ನೋ ಕೊಡ್ತತ್. ಸಾಂಸ್ಕೃತಿಕ ಕಾರ್ಯಕ್ರಮ ಏರ್ಪಡ್ತಿಂಜತ್. -ವರದಿ 4ನೇ ಪಾಳೆಲ್

ನಂಗಡೆಲ್ಲಾ ಸದಸ್ಯಂಗಕ್ ಪಿಂಜ್ ಅಭಿಮಾನಿಯಕ್ 2016ನೇ ಪುದಿಯ ಕಾಲತ್‌ರ ಆತ್ಮೀಯ ಶುಭಾಶಯ.

ಆಡಳಿತಮಂಡಳಿ, ಕೊಡವ ಸಮಾಜ ಬೆಂಗಳೂರ್

## ಕೊಡವಡ ತೋಕ್ರ ಹಕ್ಕ್: ಸರ್ಕಾರಕ್ ಮನವಿ



“ಕೊಡವಡ ತೋಕ್ರ ಹಕ್ಕ್”ರ ಬಗ್ಗೆ ಯಾಲದಾಳು ಕೆ.ಚೇತನ್ ಕರ್ನಾಟಕ ಹೈಕೋರ್ಟ್ ಅರ್ಜಿ ಇಟ್ಟಾನಗುಂಡ್, ಅದಂಗ್ ಗೃಹ ಮಂತ್ರಾಲಯವೇ(ಕೇಂದ್ರ) ತೀರ್ಮಾನ ಎಡ್ತವಂಡುಂಡ್ ಹೈಕೋರ್ಟ್ ಆದೇಶ ಆಯಿತಿಂಜತ್. ಅನ್ನನೆ ಕೇಂದ್ರ ಗೃಹ ಮಂತ್ರಾಲಯ ನಂಗಡ ರಾಜ್ಯ ಗೃಹ ಮಂತ್ರಾಲಯತೇ ಈಂಡ ನಿರ್ಧಾರ ಮಾಡ್ಡೇಂಡ್ ಆದೇಶ ಮಾಡ್ಚಿ. ಈ ನ್ಹಲ್, ನಂಗಡ ತೋಕ್ರ ಹಕ್ಕ್ ಒರೂ ತೊಂದರೆ ಆಪಕಾಗ, ಅದಂಗ್ ಸರಿಯಾನ ಪರಿಹಾರ ಸಮಯಕ್ ಮುಪ್ಪಡೇ ಕಾಂಗಂಡು ಎಣ್ಣುವ ನ್ಹಲ್, ಬೆಂಗಳೂರ್ ಕೊಡವ ಸಮಾಜ ಕಯಿಂಜ ನವಂಬರ್ 10ಂಡ್ ಸುಮಾರ್ ಗಣ್ಯಂಗಳ ಕೂಟತ್ ಬಲ್ಯ ಸಭೆ ಕಾಕಿತಿಂಜತ್. ಈ ಸಭೆರ ಅಧ್ಯಕ್ಷತೆನ ವಹಿಸಿಯಂಡ ಮಾಜಿ ಮಂತ್ರಿಯಾನ ಮೇರಿಯಂಡ ಸಿ. ನಾಣಯ್ಯ ಕೊಡವಡ ಪರ ಪೇಶ್ ನಲ್ಲ ತಕ್ಕ್

ಪರಂದಿತ್ ತೋಕ್ರ ಹಕ್ಕ್ನ ಕಾಪಾಡುವ ನ್ಹಲ್ ತೊಡಿಕೇ ಸರಿಯಾನ ಮನವಿನ ಸರ್ಕಾರಕ್ ಕೊಡ್ಕಂಡೂಂಡ್ ಎಣ್ಣೆಚಿ. ಇನ್ನನೆ ಬಾಕಿ ಸುಮಾರ್ ಗಣ್ಯಂಗಳ ಸಲಹೆ ಪೋಲೆ, ಬಯ್ಯಂಜಿ 11 ಅನುಭವಿಯಡ ಸಮಿತಿಕಾರ ಕೂಡಿತ್ ಸರಿಯಾನ ಮನವಿ ಪತ್ರತನ ಮಾಡ್ಚಿ.

ಈ ಸಮಿತಿ ಮಾಡ್ನ ಮನವಿರ ಪ್ರತಿನ ಬೆಂಗಳೂರ್ ಕೊಡವ ಸಮಾಜಕ್ ಒಪ್ಪಾಚಿಟ್ಟಿತ್. ಕೊಡವ ಸಮಾಜ ಆಡಳಿತ ಮಂಡಳಿ ಇದನೆಲ್ಲಾ ಪರಿಶೀಲನೆ ಮಾಡಿತ್, ಈ ಮನವಿರ ಪ್ರತಿನ ಮುಖ್ಯವಾಯಿತ್ ಈ ಕೇದಲ್ ಕಾಟನ್ ಸರ್ಕಾರತ್ ಡಿಪಾರ್ಟ್‌ಮೆಂಟ್ಕ್ ಖುದ್ದಾಯಿತ್ ಕೊಡ್ತತ್.

01. ಕೇಂದ್ರ ಕಾನೂನ್ ಮಂತ್ರಿ-ಡೆಲ್ಲಿ
02. ರಾಜ್ಯ ಕಾನೂನ್ ಮಂತ್ರಿ-ಬೆಂಗಳೂರ್
03. ರಾಜ್ಯ ಗೃಹ ಮಂತ್ರಿ- ಬೆಂಗಳೂರ್
04. ರಾಜ್ಯ ಆಹಾರ/ನಾಗರಿಕ ಸರಬರಾಜ್ ಮಂತ್ರಿ-ಬೆಂಗಳೂರ್
05. ಕೊಡಗ್ ಜಿಲ್ಲೆರ ಉಸ್ತುವಾರಿ ಮಂತ್ರಿ- ಬೆಂಗಳೂರ್
06. ರಾಜ್ಯ ಗೃಹ ಕಾರ್ಯದರ್ಶಿ- ಬೆಂಗಳೂರ್
07. ಕೇಂದ್ರ ಗೃಹ ಕಾರ್ಯದರ್ಶಿ, ಡೆಲ್ಲಿ-ಪೋಸ್ಟರ ಮೂಲಕ

ಇನ್ನನೆ ನಿರಂತರವಾಯಿತ್ ಬೆಂಗಳೂರ್ ಕೊಡವ ಸಮಾಜ ಕಯಿಂಜ ಚೆನ್ನ ತಿಂಗತಿಂಜ ಮಾಡ್ನ ಪ್ರಯತ್ನತರ ಪ್ರತಿಫಲ ನಂಗಡ ಕೊಡವಡ ತೋಕ್ರ ಹಕ್ಕ್ನ ಕಾಪಾಡುವ ಎಣ್ಣುವ ಭರವಸೆ ನಂಗ ಪೋನಲ್ಲಿ ಕಟ್ಟಿತ್ ಎಣ್ಣುವಕ್ ಕುಸಿ ಆಪ.

-ಚೆನ್ನಪಂಡ ಕೆ.ಸುಬ್ಬಯ್ಯ  
ಗೌರವ. ಕಾರ್ಯದರ್ಶಿ

### ಬೆಂಗಳೂರ್ ಸಮಾಜತ್ ಜ.28 ಂಗ್ ಫೀ.ಮಾ.ಕಾರ್ಯಪ್ಪ ಪುಟ್ಟನ್ ನಮ್ಮೆ



ಬೆಂಗಳೂರ್ ಕೊಡವ ಸಮಾಜತ್ ಇದೇ ಜನವರಿ 28ಂಡ್ ಬೈಟಾಪಕ 6.30 ಗಂಟೆಕ್ ಫೀ.ಮಾ. ಕೊಡಂದೇರ ಎಂ. ಕಾರ್ಯಪ್ಪಜ್ಜಂಡ 117ನೇ ಪುಟ್ಟನ್ ನಮ್ಮೆನ 'ಸಾಂಸ್ಕೃತಿಕ ದಿನ' ಆಯಿತ್, ಮಂಡೇಡ ಎ. ರವಿ ಉತ್ತಪ್ಪಂಡ ಮುಂದಾಳ್ತನತ್ ನಡ್ತವದುಂಡ್. ಮುಖ್ಯ ಬೆಂದು ವಾಯಿತ್ ಬ್ರಿಗೇಡಿಯರ್ (ರಿ) ಪಟ್ಟಪಂಡ ಟಿ. ಮೊಣ್ಣಪ್ಪ VSM ಬಪ್ಪ. ಅಂದ್ ಜ.15ಂಡ್ ನಡ್ತನ ಸಾಂಸ್ಕೃತಿಕ ಪೈಪೋಟಿಲ್ ಗೆದ್ದಯಿಂಗಕ್ ಇನಾಮು ಕೊಡ್ಪದಲ್ಲತೆ ಸಾಂಸ್ಕೃತಿಕ ಕಾರ್ಯಕ್ರಮ ಏರ್ಪಡ್ತವದುಂಡ್ ಎಣ್ಣಿತ್ ಸಮಾಜ ಕಾರ್ಯದರ್ಶಿ ಚೆನ್ನಪಂಡ ಕೆ. ರವಿ ಸುಬ್ಬಯ್ಯ ಅರಿಚಿಟ್ಟಿತ್.

### ಬೆಂಗಳೂರ್ ಕೊಡವ ಸಮಾಜತ್ 48ನೇ ಕಾಲತ್ರ ಮಾಸಭೆ

ಬೆಂಗಳೂರ್ ಕೊಡವ ಸಮಾಜತ್ 48ನೇ ಕಾಲತ್ರ ಮಾಸಭೆ ತಾ. 29.11.2015ಂಡ್ ಪೊಲಾಕ ಸಮಾಜತ್ 'ಫೀ.ಮಾ.ಕೆ.ಎಂ. ಕಾರ್ಯಪ್ಪ ಭವನ'ತ್ ಸಮಾಜ ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪಂಡ ಅಧ್ಯಕ್ಷತೆಲ್ ನಡಂದತ್. ಕಾರ್ಯದರ್ಶಿ ಚೆನ್ನಪಂಡ ಕೆ. ರವಿ ಸುಬ್ಬಯ್ಯ ಆಧ್ಯಮೊಳಿ ಪರಂದತ್. ಕು.ಮಚ್ಚಿರ ಯಶಿಕಾ ಪೆಮ್ಮಯ್ಯ ಪ್ರಾರ್ಥನೆ ಮಾಡ್ಚಿ. ಮರಣಪಟ್ಟ ಸದಸ್ಯಂಗಡ ಆತ್ಮಕ್ ಶಾಂತಿ ಬಯಂದಿತ್ ದಂಡ್ ನಿಮಿಷ ಮೊನ ಆಚರಣೆ ಮಾಡ್ಚಿ. ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪಯಿಂಗ ಸ್ವಾಗತ ಬಯಂದಿತ್, ಸಮಾಜತ್ರ ಕಾರ್ಬಾರ್ನ ವಿವರಿಚಿಟ್ಟಿತ್. ಕಯಿಂಜ ಮಾಸಭೆ ವರದಿ, ಆಡಳಿತಮಂಡಳಿ ವರದಿ ಲೆಕ್ಕಪತ್ರ, ಬಜೆಟ್.. ಎಲ್ಲಾ ಆನದು ಆಖೀರಿಲ್ ಸಮಾಜ ಉಪಾಧ್ಯಕ್ಷಿಣಿ ಮುಕ್ಕಾಟಿರ ವಾಣಿ ನಾಣಯ್ಯ ವಂದನಾರ್ಪಣೆ ಮಾಡ್ಚಿ.

ವರದಿ: ಚೆನ್ನಪಂಡ ಕೆ. ರವಿ ಸುಬ್ಬಯ್ಯ  
ಗೌ. ಕಾರ್ಯದರ್ಶಿ

**ಪೊಂಬೊಳಕ್**

ಬೆಂಗಳೂರ್ ಕೊಡವ ಸಮಾಜತ್  
ಮೂಂತಿಂಗ ಪತ್ರಿಕೆ  
ನವಂಬರ್ 2015-ಜನವರಿ 2016  
ಕಾಲ 13 : ಸಂಚಿಕೆ 3  
ಎಲ್ಲಾ ಹಕ್ಕುನ ಕಾತ್ ಬೆಚ್ಚಿತ್.

ಸಂಪಾದಕ ಮಂಡಳಿಕಾರ  
ಪ್ರಧಾನ ಸಂಪಾದಕ  
ಪಳಂಗಂಡ ಕೆ. ಚಂಗಪ್ಪ

ಸಂಪಾದಕಂಗ

ಮೇ. ಮುಂಡಂಡ ಎ. ಮಾಚಯ್ಯ  
ಚೋವಂಡ ಎಸ್. ಬೋಪಯ್ಯ  
ಮಣವಟ್ಟಿರ ಜಯ ಬೆಳ್ಳಪ್ಪ  
ನಂಬಿಯಪಂಡ ಜಿ. ರಂಜು ನಾಣಯ್ಯ  
ಬಲ್ಲಮಾಡ ಮೋಹನ್ ದೇವಯ್ಯ(ಟಿಟ್ಟು)

ಆಡಳಿತಮಂಡಳಿ ಪರವಾಯಿತ್  
ಬೂವಡಿರ ಎಂ. ಗಣಪತಿ  
ಖಜಾಂಚಿ, ಕೊಡವ ಸಮಾಜ.

ಪತ್ರಿಕೆರ ಮುದ್ರಕ ಪಿಂಞ ಪ್ರಕಾಶಂಗ  
ಚೆನ್ನಪಂಡ ಕೆ. ಸುಬ್ಬಯ್ಯ  
ಗೌ.ಕಾರ್ಯದರ್ಶಿ, ಕೊಡವ ಸಮಾಜ

**'ಪೊಂಬೊಳಕ್' ಪತ್ರಿಕೆರ**

ಪ್ರತಿ ಸಂಚಿಕೆರ ಜಾಹೀರಾತ್ ಕ್ರಯ ವಿವರ

ಮಲ್ಟಿ ಕಲರ್ ಪ್ರಿಂಟ್-

ಬೆಂಬರಿ ಕವರ್ ಪಾಳೆ: 15,000/-ಉ.

ಒರ್ ಪಾಳೆ-ಪುಲ್ : 10,000/-ಉ.

ಅರೆ ಪಾಳೆ : 5000/-ಉ.

ಕರಪು-ಬೊಳಪು White & Black ಪ್ರಿಂಟ್-

ಒರ್ ಪಾಳೆ-ಪುಲ್ : 6,000/-ಉ.

ಅರೆ ಪಾಳೆ : 3,000/-ಉ.

ಜಾಹೀರಾತ್ ಪಣತಾನ ಬೆಂಗಳೂರ್ ಕೊಡವ  
ಸಮಾಜ ಆಫೀಸ್‌ಕ್ ಎತ್ತಾಚಿಡಂಡು.

**'ಪೊಂಬೊಳಕ್' ಪತ್ರಿಕೆಕ್**

ಎಳ್ತ ಪಿಂಞ ಜಾಹೀರಾತ್ ಅಂಪಕ  
ವಿಳಾಸ:

ಸಂಪಾದಕ

'ಪೊಂಬೊಳಕ್' ಪತ್ರಿಕೆ

ಕೊಡವ ಸಮಾಜ ಬೆಂಗಳೂರ್

ನಂ. 7, 1ನೇ ಮುಖ್ಯ ರಸ್ತೆ,  
ವಸಂತನಗರ, ಬೆಂಗಳೂರ್-560 052

ಇ ಮೇಲ್: pombolak@gmail.com

(ಬರಹ/ನುಡಿ-ತಂತ್ರಾಂಶತ್ ಎಳ್ತ ಅಯಕಲು)

**ಅಧ್ಯಕ್ಷರೊಡ ದಂಡಾ ತಕ್ಕಾ**



**ಎಲ್ಲಾರ್‌ಕೂ ಪ್ರದಿಯ ಕಾಲತೆರ ಚುಭಾಚಯ ಬಯಂದವಿ.**

ನಂಗಡ ಸಂಸ್ಕೃತಿರ ಬೊಳಚಿಕಾಯಿತ್ ಮಿಂಞಾತ್ ಜನಾಂಗಕ್ ಏರ ಒತ್ತಾಸೆ ಕೊಡಕಂಡೂಂಡ್ ಕಂಡಂಡುಂಡ್. ಕೊಡವ ಪದ್ಧತಿ, ಆಚರಣೆ, ನಡಪು-ನೀತಿನಲ್ಲ ಇಕ್ಕತ ಬಾಲೆಕಾರ-ಬಾಲೆಕರ್ತಿಯ ಚಾಯಿಲ್ ಪಡಿಪಕ್ ಮಿಂಞಾಕ್ ಬಂದಂಡಿಲ್ಲೇಂದ್ ಎಣ್ಣಾನಕ ತಪ್ಪಾಪಕಿಲ್ಲೆ. ನಂಗಡ ಸಭೆ ಸಮಾರಂಭತ್ ಎಲ್ಲಾಂಗೂ ಕಾಂಟ್ರಾಕ್ಟ್ ಪದ್ಧತಿ ಬಂದದಂತು ನೇರ್. ಇಂದೇತ ಅನುಕೂಲಕೊತ್ತಿತ್ ನಗರ ಜೀವನತ್ ಪುರಸೊತ್ತಿಲ್ಲತಿಪ್ಪಕ ಮಂಗಲ ಚಪ್ಪರ ಇಡ್‌ವಕೂ, ಶಾಮಿಯಾನ ಇಡುವಕೂ, ಅಡಿಗೇ ಮಾಡುವಕೂ, ಬಳಂಬುವಕೂ..

ಎಲ್ಲಾಂಗೂ ಕಾಂಟ್ರಾಕ್ಟ್ ಕೊಡಕಂಡಿಯಾಪ. ಕೂಡ ಪದ್ಧತಿನ ಚಾಯೋಡೆ ನಡತುವಕ್ ಅನುಭವಿಯ ಕಟ್ಟಿಯಂಡಿಲ್ಲೆ. ಇನ್ನನಾಯಿತ್ ಪ್ರತಿಯೊಂದಾಂಗೂ ಗೊತ್ತಾ ಮಾಡ್‌ನ ಕಾಂಟ್ರಾಕ್ಟ್ ವ್ಯಕ್ತಿಯ ಸೇವೆನ ಮಾಡಿಯಂಡುಂಡ್.

ಇಂದ್ ಕೊಡವ ಮಕ್ಕ ನಂಗಡ ಪದ್ಧತಿನ ಚಾಯಿಲ್ ಪಡಿಪದ್ ನಲ್ಲದ್. ಚಾವುಲೇ ಇರಡ್, ಮಂಗಲತಲೇ ಆಕಡ್ ಎಕ್ಕಲೂ ಪದ್ಧತಿ ಮಾಡುವಕ್ ಅಪ್ಪರಿಪ್ಪರ ಆಯಂಡ್, ಪೆರಿಯವು ಬಜ್ಜಂಡ್ ಕಳಿಪದ್.. ಕಾಂಬ. ಮಕ್ಕ ಆಯಾ ನಾಡ್‌ರ ಕ್ರಮತ್ ಪದ್ಧತಿನ ನಡುವಕ್ ಪಡಿಪದ್ ದುಂಬಾ ನಲ್ಲದ್. ನಂಗಡಲ್ಲಿ ನಮ್ಮ ನಾಳ್, ಲಗ್ನಪತ್ರಿಕೆಕ್, ಎಂಗೇಜ್‌ಮೆಂಟ್‌ಕ್ ಕುಂಞಿ ಪುಟ್ಟವಕ, ಪೆದ ಇಡುವಕ, ಗಂಗಾಪೂಜೆರ ಸಮಯತ್, ಮಂಗಲತ್ ಪೊಟ್ಟಿ ದುಂಬುಚಿಡುವಕ, ಊರ್ ಕೂಡುವಂಡ್, ಮೂಹೂರ್ತಂಡ್, ನೀರ್ ಎಡ್‌ಪಕ, ಮನೆ ಮೊಟ್ಟವಕ.., ಚಾವು-ಮಾದತ್.. ಎಣ್ಣಿಯಂಡ್ ಎಲ್ಲಾ ಸಂದರ್ಭತ್‌ಲೂ ಸರಿಯಾನ ಕೊಡವ ಪದ್ಧತಿನ ರೂಢಿಕ್ ಕೊಂಡ್‌ಬಪ್ಪಕ್ ನೋಟಂಡು.

ಇಕ್ಕಿಕ್ಕ ಪುದಿಯಾಮೆ ಎಣ್ಣುಂಡ್ ಎಂತೆಂತದೋ ಪದ್ಧತಿ, ಕ್ರಮ ರೂಢಿಕ್ ಬಂದ್‌ಟಿತ್. ಕಳ್ಳ ಕೂಟುವದ್ ಏರ ಆಯಿ ಪೋಯಿತ್. ನೇರಾನ ಪದ್ಧತಿ, ನಡಪುಕ್ ಆದ್ಯತೆ ಕೊಡ್ತಂಡಿಲ್ಲೆ. ನಂಗಡ ಹಿಡ್ಡುಟ್ ಬೆಲೆ ಇಲ್ಲತಾಯಿತ್. ಒಲೆ ಪೂಜೆಕ್, ಮೂಹೂರ್ತಂಡ್ ಪೊಲಾಕ, ಬಯ್ಯಂಜಿ ನೀರ್ ಎಡ್‌ಪಕ ತೊರಂದ ಬಾರ್(ಓಪನ್ ಬಾರ್) ಪದ್ಧತಿ ಕೂಡಿತ್ ಕಡ್ಡಾಯಂಡ್ ಕಾಂಬ! ಕೇಕ್ ಕತ್ತರಿಚಿಡುವದೂ, ಶಾಂಪೇನ್ ಪಾರ್‌ಚಿಡ್‌ವದೂ ಪದ್ಧತಿ ಆಯಿಟಿತ್! ಇನ್ನತಾನ ನಂಗಡವು ನಿಪ್ಪು ಚಿಡುವಕ್ ನೋಟಂಡು. ನಂಗಡ ಮಂಟಪ ಅಲಂಕಾರ, ಬಟ್ಟೆ ಬರೆಲೂ ಮಿತಿ ಮೀರನ ಪುದಿಯಾಮೆ ಕೊಂಡಾಪದ್ ನಲ್ಲದಲ್ಲ. ಕೊಡವಾಮೆಕೊತ್ತ ಅಲಂಕಾರ, ಸತ್ಕಾರ, ತಕ್ಕಾರ ಅವಶ್ಯ ಉಂಡ್. ಸುಮಾರ್ ಜನ ತಂಗಡ ಅನುಕೂಲಕ್ ಏದೇದೋ ಪುದಿಯ ಪದ್ಧತಿನ ತಂಗಡ ಸಭೆ ಸಮಾರಂಭತ್ ಕೂಟಿಯಂಡ್ ಬಂದಂಡುಂಡ್. ಇದೆಲ್ಲಾ ರೂಡಿ ಆಯಂಡುಂಡ್; ಇದ್ ನಿಪ್ಪನ್ನೆ ಆಕಂಡು.

ಕೊಡವ ಪದ್ಧತಿರ ಪಡಿಪು ಒರ್ ವಿದ್ಯೆರನ್ನೆ ಆಪ. ಇಂದ್ ಪ್ರತಿಯೊಂದಾಂಗೂ ಕನ್ನಲ್‌ಟೆಂಟ್ ಉಳ್ಳನ್ನೆ, ಪದ್ಧತಿ ಪಡಿಪುಕಾರಕ್ ಬೋಡಿಕ್ ಉಂಡ್. ಕೊಡವ ಪದ್ಧತಿನ ಇಕ್ಕತ ಮಕ್ಕ ಚಾಯೋಡೆ ಪಡಿಚಿತ್, ಎಲ್ಲಾ ಭಾಗತ್‌ಲೂ ಅಂದೋಳತ್ ನಂಗಡ ಸಭೆ ಸಮಾರಂಭ ಎಣ್ಣಿ ಕೊಡ್‌ಪಕ್ ಮೊಳಿಯಾಕಂಡು. ಪ್ರತಿಯೋರ್ ನಲ್ಲಾಂಗೂ-ಕೆಟ್ಟಾಂಗೂ ಅನುಭವಿಯಳಾಳನ ನಲ್ಲ ಪಡಿಪುಕಾರಕ್ ಸಂಭಾವನೆ ಕೊಡ್ತಿತ್ ಕಾಕ್‌ಚಿಟ್ಟಿತ್ ಕಾರ್ಬಾರ್ ನಡ್‌ಪನ್ನೆ ಆಕಂಡು. ನಂಗಡ ಕೊಡವಾಮೆರ ಭೀರ್ಯ-ಬರ್ಕತ್ತ್ ಒತ್ತ ಪದ್ಧತಿರ ಮೂಲಕ ಬೊಳಿಯಂಡು. ಸುಮಾರ್ ಸಮಾರಂಭತ್ ಅಲ್ಲಿಯತ ಕ್ಯಾಮರಾ-ವಿಡಿಯೋಕಾರಳೇ ಪದ್ಧತಿನ ಎಣ್ಣಿ ಕೊಡ್ತಂಡುಂಡ್! ಇದ್ ಆಪಕ್ಕಾಗ.

ನಂಗಡಲ್ಲಿ, ಪೆರಿಯ ಪದ್ಧತಿ-ನಡಪು ಪರಿಚಯಕಾರಡ ಸಹಾಯತ್ ಪದ್ಧತಿ-ನಡಪು ಪಡಿಪು ಕಾರ್ಯಕ್ರಮ ಬೆಕ್ಕಂಡು. ಇದಂಗ್ ಸರಿಯಾಯಿತ್ ನಂಗಡ ನೇರಾನ ಪದ್ಧತಿನ ಚುರಕಿತ್ ಪುಸ್ತಕ ರೂಪತ್‌ಲೂ, ಇಂಟರ್‌ನೆಟ್‌ಲೂ ಕಟ್ಟವನ್ನೆ ಮಾಡಂಡು. ಮಕ್ಕ ಮೊಬೈಲ್, ಟ್ಯಾಬ್, ಕಂಪ್ಯೂಟರ್‌ಲ್ ನೋಟಿತೂ ಪದ್ಧತಿರ ಕಾರ್ಬಾರ್‌ನ ಚಾಯಿಲ್ ಮಾಡ್‌ವನ್ನೆ ಆಕಂಡು. ಇಲ್ಲೇಂಗಿ ನಂಗಡ ಕೊಡವಾಮೆ ಚೆನ್ನ ಕಾಲತ್ ಮಿಶ್ರ ಪದ್ಧತಿಲ್ ನಡ್‌ಂದಂಡ್ ಪೋಪನ್ನೆ ಆಕು. ನಂಗ ಈ ನೆಟ್‌ಲ್ ಪದ್ಧತಿ ಪಡಿಪುಕಾರಕ್ ಒತ್ತಾಸೆ ಕೊಡ್‌ಕಂಡು. ಪಣಕಾಸ್ ಸಹಾಯತ್‌ಲ್ ಮಕ್ಕಕ್ ಪದ್ಧತಿನ ಪಡಿಪುಚಿಡುವ ಕೆಲಸ ನಡ್‌ಕಂಡು.

ಮಂಡೇಡ ಎ. ರವಿ ಉತ್ತಪ್ಪ  
ಅಧ್ಯಕ್ಷ  
ಮೊಬೈಲ್: 9880899911

## ಬೆಂಗಳೂರ್ ಕೊಡವ ಸಮಾಜತ್ ಪುತ್ತರಿ ನಮ್ಮೆ



ಕೊಡವ ಸಮಾಜ 'ಪುತ್ತರಿ ನಮ್ಮೆ'ರ ಕಾರ್ಯಕ್ರಮತ್, ಕಾರ್ಯಕಾರಿ ಸಮಿತಿಕಾರಳ ಪೊನ್ನಚಿಟ್ಟಿರ ರಮೇಶ್ ಗಣಪತಿರ ಮುಂದಾಳ್ತನತ್ ಸಾಂಸ್ಕೃತಿಕ ಸಮಿತಿಕಾರ ಕೂಡಿತ್ ವೇದಿಕೆಕ್ ಕೂಟಿಯಪೋಚಿ. 'ಹರದಾಸ ಅಪ್ಪನೇರವಂಡ ಅಪ್ಪಚ್ಚಕವಿ' ಸಭಾಂಗಣತ್ ನಡಂದ ಪುತ್ತರಿ ಸಮಾರಂಭತ್ ಸಮಾಜ ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪಂಡ ಕೂಡ, ಸಮಾಜತ್ ಉಪಾಧ್ಯಕ್ಷಿಣಿ ಮುಕ್ಕಾಟೀರ ವಾಣಿ ನಾಣಯ್ಯ, ಕಾರ್ಯದರ್ಶಿ ಚಿನ್ನಪಂಡ ಕೆ. ರವಿ ಸುಬ್ಬಯ್ಯ, ಸಹಕಾರ್ಯದರ್ಶಿ ಮಾಚಿಟ್ಟಿರ ಎಂ. ಡಾಲು, ಖಜಾಂಚಿ ಬೂವಡಿರ ಎಂ. ಗಣಪತಿ ಪಿಂಞ ಸಹಖಜಾಂಚಿ ಚೇರಂಡ ಎಂ. ಸುರೇಶ್ ವೇದಿಕೆಲಿಂಜತ್.

ಸುರೂಲ್ ಕಾರ್ಯದರ್ಶಿ ಚಿನ್ನಪಂಡ ಕೆ.ರವಿ ಸುಬ್ಬಯ್ಯ ಆದ್ಯ ಮೊಳಿ ತಕ್ಕ ಪರಂದತ್. ಕೋಡಿಮಣಿಯಂಡ ಮೌಲ್ಯ ಅಚ್ಚಯ್ಯ ದೇವಳ ತುದಾಚಿ ಪಾಡಾಚಿ. ಸಮಾಜ ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪ ಸ್ವಾಗತ ಭಾಷಣ ಮಾಡಾಚಿ. ಅದಾನದು ವಿದ್ಯಾನಿಧಿರ ಸ್ಕಾಲರ್‌ಶಿಪ್‌ನ ಚೇರ್‌ಮನ್ ಮೆ.ಮುಂಡಂಡ ಎ. ಮಾಚಯ್ಯ ಪಿಂಞ ಖಜಾಂಚಿ ಬಾಳೆಕುಟ್ಟಿರ ಪಿ. ನಂಜಪ್ಪ ಕೂಡಿತ್ ಕೊಡವ ಸಮಾಜತ್ ಅಧ್ಯಕ್ಷ ಪಿಂಞ ಉಪಾಧ್ಯಕ್ಷಿಣಿರ ಕೈಂಜ ಕೊಡಪ್‌ಚಿಟ್ಟತ್. ಈಯಾಂಡ್ ಬೆಂಗಳೂರ್‌ರ 25 ಪಿಂಞ ಪೂರ್ಮತ 67 ಮಕ್ಕ ಕೂಡಿತ್ ಒಟ್ಟು 92 ಮಕ್ಕಕ್ 4,24,000/-ಉ. ಸ್ಕಾಲರ್‌ಶಿಪ್ ಕೊಡತ್. (ಎಸ್‌ಎಸ್‌ಎಲ್‌ಸಿ-₹.4,000/-, ಪಿಯುಸಿ- ₹.4,500/-,

ಡಿಗ್ರಿ-₹.5,000/-, ಬಿಇ-₹.5,500/-ಎಂಬಿಬಿಎಸ್/ ಜನರಲ್ ಪಿಜಿ- ₹. 6,000/-)

ಪೊಮ್ಮಾಲೆ ಕೊಡವ ಸಂಘಕಾರ ನಾಡೆ ಕಾಕಾಚಿ. ಅದಾನದು ಆಡಳಿತ ಮಂಡಳಿಕಾರಡ ಕೋಲಾಟ್ ನಡಂದತ್. ವಿವೇಕನಗರ ಕೊಡವ ಸಂಘಕಾರಡ ಉಮ್ಮತ್ತಾಟ್, ರಾಮೂರ್ತಿನಗರ ನೆಲ್ಲಕ್ಕಿ ಕೊಡವ ಸಂಘಕಾರಡ ದಂಡ್ ಗ್ರೂಪ್ ಡಾನ್ಸ್, ವಿದ್ಯಾರಣ್ಯಪುರ ಕೊಡವ ಕ್ಷೇಮಾಭಿವೃದ್ಧಿ ಸಂಘತ್ ಗ್ರೂಪ್ ಡಾನ್ಸ್ ಪಿಂಞ ಕೆಂಗೇರಿ ಫಿ. ಮಾ. ಕಾರ್ಯಪ್ಪ ಕೊಡವ ಒಕ್ಕೂಟಕಾರಡ ಬೀಟ್ ಡಾನ್ಸ್ ಇನ್ನತದೆಲ್ಲಾ ಇಂಜತ್.

ನೇರಕ್ ಸರಿಯಾಯಿತ್ 7.40 ಗಂಟೆಕ್ ನೆರೆ ಕಟ್ಟಿತ್, 8.40 ಗಂಟೆಕ್ ಕದ್ ಎಡ್ಡತ್. ಮೂಕಳಮಾಡ ಸುಬ್ಬಯ್ಯ ಕುತ್ತಿ ಎಡ್ಡಿತ್ ಪದ್ಧತಿ ಪೋಲೆ ಕದ್ ಎಡ್ಡತ್. ಆಖೀರಿಲ್ ಸಾಂಸ್ಕೃತಿಕ ಸಮಿತಿ ಅಧ್ಯಕ್ಷ ಪೊನ್ನಚಿಟ್ಟಿರ ರಮೇಶ್ ಗಣಪತಿ ವಂದನಾರ್ಪಣೆ ಮಾಡಾಚಿ. ಕಾರ್ಯಕ್ರಮ ನಿರೂಪಣೆನ ಚಿರಿಯಪಂಡ ಆಶ ಪಿಂಞ ಅಂಜಪರವಂಡ ರಂಜು ನಡ್ಡಾಚಿ. ಬಂದಯಿಂಗಳೆಲ್ಲ ಕುಪ್ಪಂಡ ಕರುಂಬಯ್ಯಂಡ ಮುಂದಾಳ್ತನತ್ ಬಿಲ್ಡಿಂಗ್ ಕಮಿಟಿಕಾರ ಕದನ ಕೊಡತತ್. ಮೇಕೇರಿರ ಪ್ರಕಾಶ್‌ರ ಮುಂದಾಳ್ತನತ ಪುಡ್ ಕಮಿಟಿಕಾರ ತಂಬುಟ್-ಕಳೊಂಜಿ ಪಲಾರ ಬಳಂಬುಚಿ.

ವರದಿ: ಚಿನ್ನಪಂಡ ಕೆ ರವಿ ಸುಬ್ಬಯ್ಯ, ಗೌ. ಕಾರ್ಯದರ್ಶಿ

ಬೆಂಗಳೂರ್ ಕೊಡವ ಸಮಾಜತ್ ಪುತ್ತರಿ ನಮ್ಮೆ



## ಶ್ರೀ ಕಾವೇರಿ ಸ್ಕೂಲ್ ಕ್ರೀಡಾ ದಿನಾಚರಣೆ

ಕೊಡವ ಸಮಾಜ ಎಜುಕೇಶನ್ ಕೌನ್ಸಿಲ್‌ರ ಶ್ರೀ ಕಾವೇರಿ ಸ್ಕೂಲ್ ಕ್ರೀಡಾ ದಿನಾಚರಣೆ ತಾ.20.11.2015ಂದ್ ಪೊಲಾಕ ನಡತ್‌ಚಿ. ಮುಖ್ಯ ಬೆಂದುವಾಯಿತ್ ಒಲಂಪಿಯನ್ ಹಾಕಿ ಕೋಚ್ ಚಿಪ್ಪುಡಿರ ಎಸ್. ಪೂಣಚ್ಚ ಬಂದಿತಿಂಜತ್. ಕೌನ್ಸಿಲ್‌ರ ಉಪಾಧ್ಯಕ್ಷ ಬಲ್ಲಡಿಚಂಡ ಎ. ಮಾಚಯ್ಯ, ಕಾರ್ಯದರ್ಶಿ ಮನೆಯಪಂಡ ಪಿ. ದೇವಯ್ಯ, ಸಹಕಾರ್ಯದರ್ಶಿ ಮುಕ್ಕಾಟಿರ ಎ. ಕಾವೇರಿಯಪ್ಪ, ಕೌನ್ಸಿಲ್ ಮಾಜಿ ಅಧ್ಯಕ್ಷಿಣಿ ಕೇಳಪಂಡ ದೇಚಿ ಅಚ್ಚಪ್ಪ, ಪ್ರಿನ್ಸಿಪಾಲ್ ಗೀತಾ ಎಂ. ರಾವ್, ವೈಸ್‌ಪ್ರಿನ್ಸಿಪಾಲ್ ಪಳಂಗಂಡ ಗೌರಿ ಕುಮಾರಿ ಕೂಡಿಯಾಡ್‌ಚಿ. ಬೆಂದು ಚಿಪ್ಪುಡಿರ ಎಸ್. ಪೂಣಚ್ಚ ಕಾರ್ಯಕ್ರಮ ಉದ್ಘಾಟನೆ ಮಾಡ್‌ಚಿ. ಮಕ್ಕಡ ಕಳಿ ಕೂಟ ನಡಂದತ್. ಗೆದ್ದಯಿಂಗಕ್ ಇನಾಮು ಕೊಡ್ತತ್.



## ಬೆಂಗಳೂರ್ ಶ್ರೀ ಕಾವೇರಿ ಸ್ಕೂಲ್ಸ್ 'ಸ್ಕೂಲ್ ಡೇ'

ಬೆಂಗಳೂರ್ ಇಂದಿರಾನಗರ ಕೊಡವ ಸಮಾಜ ಎಜುಕೇಶನಲ್ ಶ್ರೀ ಕಾವೇರಿ ಸ್ಕೂಲ್ಸ್ 33ನೇ 'ಸ್ಕೂಲ್ ಡೇ' ತಾ. 23.12.2015ಂದ್ ಬೈಟಾಪಕ ನಡಂದತ್. ಬೆಂಗಳೂರ್ ವಿಶ್ವವಿದ್ಯಾಲಯತ್ ರಿಜಿಸ್ಟ್ರಾರ್ ಡಾ. ಬೊಳಕಾರಂಡ ಎಸ್. ಸೀತಮ್ಮ (ತಾಮನೆ: ಕೊಕ್ಕಲೆರ) ಮುಖ್ಯ ಬೆಂದುವಾಯಿತಿಂಜತ್. ಕೊಡವ ಸಮಾಜ ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪ ಗೌರವಾನ್ವಿತ ಬೆಂದುವಾಯಿತ್ ಬಂದಿತಿಂಜತ್. ವೇದಿಕೆಲ್ ಸಮಾಜ ಉಪಾಧ್ಯಕ್ಷಿಣಿ ಮುಕ್ಯಾಟಿರ ವಾಣಿ ನಾಣಯ್ಯ, ಖಜಾಂಚಿ ಬೂವಡಿರ ಎಂ. ಗಣಪತಿ ವೇದಿಕೆಲ್ ಎಜುಕೇಶನ್ ಕೌನ್ಸಿಲ್ ಉಪಾಧ್ಯಕ್ಷ ಬಲ್ಲಡಿಚಂಡ ಎ. ಮಾಚಯ್ಯ, ಗೌ.ಕಾರ್ಯದರ್ಶಿ ಮನೆಯಪಂಡ ಪಿ. ದೇವಯ್ಯ, ಸಹಕಾರ್ಯದರ್ಶಿ ಮುಕ್ಯಾಟಿರ ಎ. ಕಾವೇರಪ್ಪ, ಖಜಾಂಚಿ ಚೊಟ್ಟೆಕಾಳಪಂಡ ಎನ್. ಮಾದಯ್ಯ, ಪ್ರಿನ್ಸಿಪಾಲ್ ಗೀತಾ ಎಂ.ರಾವ್, ವೈಸ್ ಪ್ರಿನ್ಸಿಪಾಲ್ ಪಳಂಗಂಡ ಗೌರಿ ಕುಮಾರಿ ಕೂಡಿಯಾಡ್‌ಚಿ. ವೈಸ್ ಪ್ರಿನ್ಸಿಪಾಲ್ ಪಳಂಗಂಡ ಗೌರಿ ಕುಮಾರಿ ಸ್ವಾಗತ ಬಯಂದತ್. ಸಾಧಕ ಮಕ್ಕಕ್ ಸನ್ಮಾನ ಮಾಡ್‌ಚಿ. 'ಪಂಚತತ್ವ' ಎಣ್ಣುವ ಸಾಂಸ್ಕೃತಿಕ ಕಾರ್ಯಕ್ರಮ ನಡತ್‌ಚಿ.



## ಶ್ರೀ ಕಾವೇರಿ ಪಿಯು + ಡಿಗ್ರಿ ಕಾಲೇಜ್ ಡೇ

ಬೆಂಗಳೂರ್ ಇಂದಿರಾನಗರ ಕೊಡವ ಸಮಾಜ ಎಜುಕೇಶನ್ ಶ್ರೀ ಕಾವೇರಿ ಪಿಯು ಪಿಂಞ ಮ್ಯಾನೇಜ್ ಮೆಂಟ್ ಪದವಿ ಕಾಲೇಜ್ 8ನೇ ಕಾಲತ್ 'ಕಾಲೇಜ್ ಡೇ' ತಾ. 22.12.2015ಂದ್ ಪೊಲಾಕ ನಡಂದತ್. ಬೆಂಗಳೂರ್ ಮೇ.ಜ. ಮೂವೇರ ಸಿ. ನಂಜಪ್ಪ ಮುಖ್ಯ ಬೆಂದುವಾಯಿತಿಂಜತ್. ಕೊಡವ ಸಮಾಜ ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪ ಗೌರವಾನ್ವಿತ ಬೆಂದುವಾಯಿತ್ ಬಂದಿತಿಂಜತ್. ವೇದಿಕೆಲ್ ಸಮಾಜ ಉಪಾಧ್ಯಕ್ಷಿಣಿ ಮುಕ್ಕಾಟಿರ ವಾಣಿ ನಾಣಯ್ಯ, ಸಹಕಾರ್ಯದರ್ಶಿ ಮಾಚಿಟ್ಟಿರ ಎಂ. ಡಾಲು, ಸಹಖಜಾಂಜಿ ಚೇರಂಡ ಎಂ. ಸುರೇಶ್, ಎಜುಕೇಶನ್ ಕೌನ್ಸಿಲ್ ಗೌ.ಕಾರ್ಯದರ್ಶಿ ಮನೆಯಪಂಡ ಪಿ. ದೇವಯ್ಯ, ಸಹಕಾರ್ಯದರ್ಶಿ ಮುಕ್ಕಾಟಿರ ಎ. ಕಾವೇರಪ್ಪ, ಖಜಾಂಜಿ ಚೊಟ್ಟಿಕಾಳಪಂಡ ಎನ್. ಮಾದಯ್ಯ, ಪ್ರಿನ್ಸಿಪಾಲ್ ಬೊಟ್ಟೋಳಂಡ ಹನ್ನಾ ಮುತ್ತಪ್ಪ ಕೂಡಿಯಾಡ್ಚಿ. ಸಾಧಕ ಮಕ್ಕಕ್ ಸನ್ಮಾನ ಮಾಡ್ಚಿ. ಸಾಂಸ್ಕೃತಿಕ ಕಾರ್ಯಕ್ರಮ ಇಂಜತ್.





## ಕೊಡವ ಮಂಗಲ ಅಂದ್..ಇಂದ್..!?

ಕೊಡವಡ ಮಂಗಲ ದುಂಬಾ ಚಾಯಿಂದ್ ಎಲ್ಲಾರೂ ಹೊಗಳುವ. ಕೊಡವಡ ಬಟ್ಟೆ ಬರೆ, ಮಂಗಲ ಪೊರಪಾಡ್ ಎಲ್ಲಾ ವಿಶೇಷತೆಲ್ ಕೂಡಿರುಂಡ್. ಇಂದ್ ಮಾಲ್ ಮಟ, ಬಟ್ಟೆ ಬರೆ ಚಾಯಿಯೇ ಬೋರೆ. ಪುದಿಯಾಮೆಕೊತ್ತ ಡಿಸೈನ್ಲ್ ಕೊಡವಡ ಮಂಗಲವೂ ಕೂಡಿ ಪೋಯಿತ್. ಆಚೇಂಗಿ ನಂಗಡ ಪದ್ಧತಿ-ನಡಪುನ ನೋಟುವಕ ಮಾತ್ರ ದುಂಬಾ ಬೇಜಾರಾವ.

ನಂಗಡ ಬೆಂದು ತಕ್ಕಾರ ಎಲ್ಲಾ ತೆರಾಚಿ ಪೋಯಿತ್! ಹಾಯ್ ಬಾಯ್, ಹಲೋ.. ಕಾಲತ್ ಅರೆ ಬಗ್ಗಿತೂ ಕಾಲ್ ಪುಡಿಪಕ್ ಪುರಸೊತ್ತಿಲ್ಲೆ. ಕೊಡವೇತರಂಗಳ ಕಾಕಿ ಕೂಟಿತ್ ಬಪ್ಪದು ಅಯಿನ ತಬ್ಬಿ ಕಳಿಪ, ಮುತ್ ಕೊಡಪೊ.. ಇನ್ನತದ್ ಏರ ಆನದ್ ಸರಿ ಕಾಂಬುಲೆ. ಮಾಲೆ ಇಡುವಲ್ಲಿ ಕಾಮೊಟ್ಟು ಉತ್ತುವಕೂ ಕಷ್ಟ ಕಳಿಪ. ಅದೆಚ್ಚಕೋ ಜನ ಚಪ್ಪಲ್ ಶೂ..ಲೇ ಮಂಗಲ ಮಂಟಪಕಾಲೆ ಓಡಿ ಕಳಿಪ. ಮಂಟಪತ್, ಕೋಂಬರಲ್ ಕಣ್ಣಿನ, ಮೂಡಿನ ಕಂಡಿತ್ ಅಯಿಂಡ ಪ್ರೆಂಟ್, ಸಂಸಾರ ತಬ್ಬಿ ಕಳಿಪದ್ ಇಂಞೂ ಬಲ್ಯ ತಪ್ಪಾಯಿತ್ ಕಂಡಂಡುಂಡ್.

ಮಂಗಲತನ ಏರ ಜನ ಕೂಟಿತೂ, ಗೌಜಿಲೂ ಕಯಿಪದ್ ಅಯಿಂಡಯಿಂಡ ಅನುಕೂಲಕ್ ಕೂಡುವ. ಆಚೇಂಗಿ ಪದ್ಧತಿನೇ ತಿರಾಚಿ ಮರಾಚಿ ಕಳಿಪದಂತು ದಾರೂಕೂ ಕುಸಿಯಾಪುಲೆ. ನಂಗಡ ಮಂಗಲತ್ ಊರ್ ಕೂಡುವಂದ್ ಮನೆಕಾರ, ಊರ್ಕಾರ, ಸ್ವಂತಕಾರ ಇರಂಡು. ಆಚೇಂಗಿ ಇಲ್ಲಿ ದಾರ್ ದಾರ್ನೋ ಕಾಕಿ ಕೂಟಿತ್ 'ಊರ್ ಕೂಡುವ' ದಿನತರ್ ಭೀರ್ಯತ್ನ ಪಾಳಾಕಿತ್.

ಅಂದ್ ನಂಗಡ ಮಂಗಲತ್, ಊರ್ ಕೂಡುವಂದ್ ಮಾಲೆ ಇಟ್ಟಿತಾನದು, ಕಣ್ಣ-ಮೂಡಿ ಪೊರ್ಮೆ ಕಡ್ಪಯಿಂಜಿಲೆ. ಪಿತ್ಯಾಂದ್ ಮೂಹೂರ್ತಕೂ ಪರಸ್ಪರ ಅದಂಡಾಳ್, ಮೂಹೂರ್ತಕೆತ್ತಣೆ ಮೂಡ್ ನೋಟತೆ ಮೂಹೂರ್ತಕ್ ಅಳ್ ಪಂಜತ್. ಕಣ್ಣ-ಮೂಡಿಕ್, ಮುತ್ತದೆ ಪೊಣ್ಣಾಳ್ ಪೊಂಬಣ ಕೆಟ್ಟುವಂಜತ್. ಇಂದ್ ಎಳಿಯ ಮಕ್ಕ ಮರಿಯಳೂ ಬೆಂದ್ಕಳೂ 'ಪೊಂಬಣ' ಕಟ್ಟುವ. ಇದೂ ತಪ್ಪು. ಪೊಂಬಣತನ ಕಣ್ಣ-ಮೂಡಿಕ್ ಪೆರಿಯವು ಪದ್ಧತಿ ಪೋಲೆ ಕಟ್ಟುವದ್ ನೇಮ. ಮಂಗಲತ್ ಕಾಫಿ ತಿಂಡಿಕ್, ಪಣ ಕೆಟ್ಟುವಕ್, ಉಂಬಕ್.. ಎಲ್ಲಾಂಗೂ ನೂಕ್ ನುಗ್ಗಲ್ ಸುರುವಾಯಿತ್. ಇಚ್ಚಕ್ ಜನಳ ಕಾಕಿ ಕೂಟ್ವ ಖರ್ಚಿನ ದಂಡಾಂಗಡೆ ಕಮ್ಮಿ ಮಾಡಲು.

ಮೂಡಿರ ನೀರ್ ಎಡ್ಪ ಕಥೆ ಎಂತೋ ಆಯಿ ಪೋಯಿತ್. ಕಣ್ಣಂಡ ತಮ್ಮಣಂಗ ಆಡಂಡಿಯ ಜಾಗತ್, ಕುಡ್ಚಂಡ್ ಬೋರೆ ದಾರೋ ಆಡುವ. ಏಳೆಟ್ಟು ಗಂಟೆ ಆಡುವದ್ ಬೋರೆ. ಮಂಗಲಕರ್ತಿಕ್ ಅಚ್ಚಕ್ ನೇರ ನಿಪ್ಪಕ್ ಕೈಯ್ಯತೆ ಅವ ಕುರ್ಚಿಲ್ ಬಿಂದಿಗೆ ಬೆಚ್ಚಿತ್ ಅಳಪದೂ ಉಂಡ್. ಸ್ವಂತಕಾರಕ್ ದೂರ ದೂರ ಪೋಪಕ್, ಚಾಕ್ರಿಕ್ ಪೋಪಕ್ ಎಲ್ಲಾಂಗೂ ಇದ್ನುಂಡ್ ಕಷ್ಟ ಆಯಂಡುಂಡ್. ಕೇಕ್ ಕತ್ತರಿಚೆವ ಕ್ರಿಶ್ಚಿಯನ್ ಪದ್ಧತಿನ ದಾರ್ ಎಲ್ಲಿಂಜ ಸುರು ಮಾಡ್ಚೋ ಗೊತ್ತಿಲ್ಲೆ! ಅಲ್ಲಿಂಜಿ ಕಣ್ಣ ಮೂಡಿ ಕೈ ಕೈ ಪುಡಿಚಂಡ್ ಉಂಬಕ್ ಪೋಪದ್ ಬೋಂಡುವಾ?

ಮಂಗಲಕರ್ತಿರ ಪದ್ಧತಿ, ಕಣ್ಣಂಡ ಪದ್ಧತಿನೆಲ್ಲಾ 'ಸಿಂಪಲ್' ಮಾಡಿ ಬುಟ್ಟುಟಿತ್! ಮೂಡಿರ ಮುಸ್ಕ್ ನೀಕುವಾನ, ಕಣ್ಣ-ಮೂಡಿನ ಕೋಂಬರೆಕ್ ಕೂಟುವಾನ ಪದ್ಧತಿ ಪೋಲೆ ನಡುವ ನೇರಕ್ ಸಮಯತ್ ಅಭಾವ ಕಾಂಬ. ಕಣ್ಣಂಡ ಮನೆರ ಪದ್ಧತಿ ಚುರ್ಕಿತ್ ನಡಪ. ಅವಕ್ ಬಾಕೆಮನೆಲ್ 'ಪೆದ' ಇಡ್ವದೂ ಸುಮಾರ್ ಕಡೆ ಇಲ್ಲೆ.. ಇನ್ನನೆ ಗೌಜಿಲ್ ನಡಪ ಮಂಗಲತ್ ಮಿಂಞಕ್ ಕೊಡವಾಮೆರ ಭೀರ್ಯ ಕಳಂದವತನ್ನಕೆ ಮಂಗಲ ಕೈಪವೂ, ಕೊಡವ ಸಮಾಜಕಾರಳೂ ಮುತ್ತುವರ್ಜಿ ವಹಿಸುವದ್ ಅವಶ್ಯ ಆಯಿತ್ ಕಾಂಬ.

-ನಾಯಕಂಡ ಬೇಬಿ ಚಿಣ್ಣಪ್ಪ, ವೀರಾಜಪೇಟೆ

ಕಿರ್ ಕವನ

### ಇನಾಂ

ಪತ್ರನೇ ಕ್ಲಾಸ್ ಫೇಲಾನೆ ಪಪ್ಪಾಂದ್

ದು:ಖಿತ್ ಎಣ್ಣಣೆ

ತಕ್ಷಣ ತಾತ್

ಮೂಂದಾಯಿರ ನಾಕ್

ಆಶ್ಚರ್ಯತ್ ಮೂಡ್ ನೋಟಣೆ

ಕೂಡೇ ಎಣ್ಣೆಚಿ-

ಕೊಂಡ ಬಾ ಗೋಣಿಕೊಪ್ಪತ್‌ಂಜಿ

ದಂಡ್ ಪೋರಿ

ನೀನೋದ್‌ನದ್ ಮದಿ ಪೋಲಿ!

-ಬೊವ್ವೇರಿಯಂಡ ಪುಟ್ಟ ಪೆಮ್ಮಯ್ಯ

ಹುಣಸೂರ್(ಇಕ್ಕ ಕಣ್ಣಿರೆ)

### ಮಾರ್ಚ್ 31.

#### ಜ.ತಿಮ್ಮಯ್ಯ ಪುಟ್ಟನ ದಿನ



ಮಹಾನ್ ಸೇನಾನಿ ಜನರಲ್

ಕೊಡಂದೇರ ಎಸ್. ತಿಮ್ಮಯ್ಯಂಡ

ಪುಟ್ಟನ ನಮ್ಮ ತಾ. 31.3.2016ಂದ್

ನಡಪ. ಅಂದ್ ಪೊಲಾಕ 9.30

ಗಂಟೆಕ್ ಬೆಂಗಳೂರ್ ಕೊಡವ

ಸಮಾಜಕಾರ, ಬೆಂಗಳೂರ್ ಎಎಸ್‌ಸಿ

ಸೆಂಟರ್‌ಲ್ ಉಳ್ಳ ಅಯಿಂಡ ಸಮಾಧಿಕ್

ಪೂ ಇಟ್ಟಿತ್ ಗೌರವ ಕಾಟ್ವ ಕಾರ್ಯಕ್ರಮ ಬೆಚ್ಚಂಡಿತ್.

ಸವಾರಂಭಕ್ ಎಲ್ಲಾ ಸಂಘಕಾರ, ಅಭಿಮಾನಿಯು

ಕೂಡಿಯಾಡಂಡೂಂಡ್ ಸಮಾಜ ಕಾರ್ಯದರ್ಶಿ ಚಿನ್ನಪಂಡ ಕೆ.

ರವಿ ಸುಬ್ಬಯ್ಯ ಕೇಟಂಡಿತ್.

## ಸಾಹಿತ್ಯ ಪೊಂಬೊಳಕ್

### ತಕ್ಕ್ ಬಾಕ್ - ರಂಜು

**ಪುಳ್ಯಂಗಡ ಅರುಣ್, ಬೆಸಗೂರ್ ಕೊಡಗ್**

ತಾಮನೆ ಮೂಡಿಯ ಮುದಾಕಿಯ ಆಯಿತುಂಡೇಂಗಿಯೂ ಎಲ್ಲಾರೂ ಅಯಿನ 'ತಾಮನೆ ಮೂಡಿಯಾ'ಂದೇ ಎಣ್ಣುವಲ್ಲಾ ಎನ್ನಂಗ್?

- 'ತಾಮನೆ' ಎಣ್ಣುವದ್ ಪೊಮ್ಮಕ್ಕಕ್ ಕೊದಿ ಪಟ್ಟಿ ಜಾಗ. ಪುಟ್ಟನ ಮನೆಲ್ ಅವು ಎಕ್ಕಲೂ 'ಮೂಡಿ' ಆಯಿತಿಪ್ಪಕೇ ಇಷ್ಟ ಪಡುವ!

**ಚೆನಿಯಪಂಡ ಮನು, ರಾಜರಾಜೇಶ್ವರಿನಗರ, ಬೆಂಗಳೂರ್**

ಪಂಡೆಲ್ಲ 'ಮಂದ್ ಮಾನಿ'ಲ್ ಜನ ಕೂಡ್‌ನಲ್ಲಿ ಪೊಯ್ತಾಂಗಳಿ ಮಾಮೂಲ್. ಇನ್ನನಾಯಿತ್ ಇಕ್ಕ ಆ 'ಮಂದ್ ಮಾನಿ' ನಿಂದ್ ಪೋಚಾ?

- ಮಂದ್ ಮಾನಿ, ಒಗ್ಗಟ್ಟ್ ಒತ್ತೋರ್ಮ್ ಎಲ್ಲಾ ಇಂದೇಕೂ ಉಂಡ್. ಈ 'ಪೊಯ್ತಾ ಕಳಿ' ಮಾತ್ರ ಇಕ್ಕ ರಾಜಧಾನಿಲ್ ರಾಜಕಾರಣಿಯಡ ಕೈಲ್ ಮಾತ್ರ ಕಾಂಬ!

**ತೀತರಮಾಡ ಅಶೋಕ್, ಪೀಣ್ಯ ದಾಸರಳ್ಳಿ ಬೆಂಗಳೂರ್**

ಕೊಡಗಲ್ ಕಾಡ್ ಜಾತಿಯ(ಪ್ರಾಣಿಯು) ಮನೆಕ್ ನುಗ್ಗನಕಲೂ ಬೊಡಿ ಬೆಪ್ಪಕಯ್ಯತ ತೋಕನ, ಬೆಂಗಳೂರ್‌ಲ್ ಮುಂಡತೆ ಪುಡ್‌ಚಂಡ್ ಅಳ್‌ಪವು ಗಟ್ಟಿಗಂಗಂದ್ ನಾಕಾಪ.

- ನೇರ್ ಅಣ್ಣ. 'ಶೋಕೇಸ್'ಲ್ ಬೆಪ್ಪಾಂಗಿಂಜಿ 'ಶೋ' ಮಾಡಿತ್ ನೇಡ್‌ವವು ಗ್ರೇಟ್!

**ಐಚಿಟ್ಟರ ವೇಣು ಉತ್ತಪ್ಪ, ಭುವನೇಶ್ವರಿನಗರ, ಬೆಂಗಳೂರ್**

ಇಲ್ಲಿ ಟಾಫಿಕ್ ಕಿರಿಕಿರಿ, ನಲ್ಲಗಾಳಿ ಇಲ್ಲೆ.. ಬೆಂಗಳೂರ್‌ನ ಬುಟ್ಟಿತ್ ಕೊಡಗ್‌ಕೇ ಪೋಯಿರನಾಂದ್ ನಾಕಾಪ. ಸರಿಯಾ?

- ಪಣ ಮಾಡ್ಯಂಡ್ ಬೆರಿಯ ಪೊರಡಿ. 'ಲೇಟ್' ಆಯಿಟಕ ಕೂಡೆ ನಿಂಗಕ್ ಕಾಯಿಲಕೊತ್ತಿತ್ ಬೋರೆ ಬೋರೆ 'ಟ್ಯಾಬ್ಲೆಟ್' ಸಹ ಬೋಂಡಿಚಾಪ!

**ಚಟ್ಟಿಂಗಡ ಕಾಶಿ ಕಾರ್ಯಪ್ಪ, ಮಲ್ಲಸಂದ್ರ, ಬೆಂಗಳೂರ್**

ಮಂಗಲ ಪಿಂಞ ಬೋರೆ ಸಮಾರಂಭಕ್ ಪೋನಕ, 'ಬಿಸ್ಕೆಟ್ ಕಾಫಿ' ಕುಡಿರಿಂದ್ ತಕ್ಕಾರ ಮಾಡುವ. ಆಚೇಂಗಿ ಅಲ್ಲಿ 'ಬಿಸ್ಕೆಟ್' ಇಪ್ಪದೇ ಇಲ್ಲೆಲ್ಲಾ!

- ಅಕ್ಕು.. ಕಾಫಿಕ್ 'ಬಿಸ್ಕೆಟ್' ಒತ್ತದ್. ಆಚೇಂಗಿ ಜನ ತಾರಾಮಾರ 'ತಿಂಡಿ' ಬೆಪ್ಪಾನಗುಂಡ್, ಮಿಂಞಕ್ 'ತಿಂಡಿ ಕಾಫಿ'ಕ್ ಬಾರೀಂದ್ ಕಾಕ್‌ವಕ್ ರೂಡಿ ಮಾಡಂಡು!

**ಮಲ್ಲೇಂಗಡ ಸುಧಾ ಮುತ್ತಣ್ಣ, ವಿವೇಕನಗರ, ಬೆಂಗಳೂರ್**

ಮಂಗಲತ್ 'ಅಳ್ತಂಡ್ ಉಂಬ ಪದ್ದತಿ' ಚಾಯಿಯಾ ಇಲ್ಲೆ, ಇಕ್ಕತ 'ತಟ್ಟೆ ಪುಡ್‌ಚಂಡ್ ನಿಂದಂಡ್ ತಿಂಬದ್' ಚಾಯಿಯಾ?

- ನೋಟಿ.. ಅಳ್ತೆ ಉಂಬಕ್ ಪುರಸೊತ್ತಿಲ್ಲತ ಕಾಲ ಇದ್! ಬಪ್ಪೋ.. ಬೋಂಡ್ಯಾನ ಇಟ್ಟಂಡ್ ತಿಂದಿತ್ ಪೋಪೋ ಕಾಲ ಇದ್. ಪರಸ್ಪರ ಕಾಂಬಕ್, ತಕ್ಕ್ ಪರೆವಕ್.. ತಾಂಗಿ ಅಳ್‌ಪಕ್.. ಟೈಮ್ ಇಲ್ಲೆ! ತಟ್ಟೆ ಊಟ ಓಕೆ..

**- ಅಲ್ಲಾರಂಡ ಸೋಮಯ್ಯ, ಪ್ರಶಾಂತನಗರ, ಬೆಂಗಳೂರ್**

ಟಿವಿ ರಿಯಾಲಿಟಿ ಶೋತ್, ಬೊರಿ ಪತ್ ದಿನ ಮನೆಂಜಿ ದೂರ ಆಯಿಟಕ ಮೊರಡುವ, ಕಣ್ಣೀರ್ ತೊರಿವ.. ಆಚೇಂಗಿ ಸೈನ್ಯತ್ ಕೂಡ್‌ನವು ಪಂಡ್ ತಿಂಗಗಟ್ಟಲೆ, ಕಾಲಗಟ್ಟಲೆ ಪೋನಿಲ್ಲತೆ, ತಕ್ಕಿಲ್ಲತೆ ಸಂಸಾರ ಬುಟ್ಟಿತ್ ಇಪ್ಪಂಜತಲ್ಲಾ ಎನ್ನನೆ?

- ರಿಯಾಲ್ಟಿಲ್ 'ರಿಯಲ್' ಕಳಿಪ ನಾಟಕ: ಸೈನ್ಯತ್ ಅದ್ ದೇಶ ಪ್ರೇಮತ್‌ರ ಪ್ರೀತಿ.. ತ್ಯಾಗ.. ಬದ್‌ಕ್..

**ನಂಬಿಯಪಂಡ ಮಿಥುನ್, ಯಶವಂತಪುರ, ಬೆಂಗಳೂರ್**

ಪೊರಜಾತಿ ಮಂಗಲಾಪ ಪೊಮ್ಮಕ್ಕಕ್ ನಿಂಗಡೋರ್ ಕೆಮಿತ್‌ಕ್ ಎಣ್ಣೆ...

- ಪೊರಜಾತಿ ಮಂಗಲಾಪದ್, ತಾಂಡ ಅಪ್ಪವ್ವನ 'ಬಯತಾನಯಿಂದ ಬಿಡಾರ್'ಕ್ ಕೂಟ್‌ವಾಂಗಿಂಜಿ ಬಲ್ಯ ಶಿಕ್ಷೆ.. ಕೊಡ್ತನ್ನೆ!

**ನಂಬಿಯಪಂಡ ಮಿಥುನ್, ಯಶವಂತಪುರ, ಬೆಂಗಳೂರ್**

ಮಂಗಲತ್ ಇಕ್ಕಿಕ್ಕ ದಂಡ್ ದಿನತ್ ಆರ್ ನೇರೋ 'ಕಳ್ಳಿ ಕೊಡ್‌ಪ ಪದ್ದತಿ' ಸುರುವಾಯಿತಲ್ಲ?

- ಮಂಗಲ ಕಯಿಚವು ಸಾಲ ಸೋಲತ್ ಮೂಲೆಕಾಕ ಕಂಡು; ಕುಡಿಚವು ಅವುಲ್ ಮೂಲೆಲ್ ಬೂವಂಡು ಎಣ್ಣುವ ಉದ್ದೇಶ..!

**ಕರೋಟಿರ ಕಿಶ, ಪೀಣ್ಯ ದಂಡನೇ ಸ್ಟೇಜ್, ಬೆಂಗಳೂರ್**

ಕೊಡಗಲ್ ಕಾಫಿ ಕೊಯ್ಯುವಕ, ನೆಲಕ್ ಬುದ್ದ ಕಾಫಿನ ಸುಮಾರ್ ಜನ ಪೊರ್‌ಕ್‌ವದೇ ಇಲ್ಲೆಲೊ. ಎಲ್ಲಾ 'ಬಲ್ಯ ಮನ್‌ಷ್ಯಂಗ್' ಆಯಿರ್‌ತಾ?

- 'ಕಾಫಿ ಪೊರ್‌ಕ್'ನ ಸಂಬಳ, 'ಕಾಫಿ ಮಾರ್‌ನಕೋ' ಕೊಡ್‌ಪಕ್ ಕಯ್ಯತ ಕಾಲ ಇಕ್ಕ! ಕೂಲಿ ಅನ್ನನೆ ಉಂಡ್..

#### ಕಿರ್ ಕವನ

ಕರ್ತ ಚುಕ್ಕಿ

ಪದ್ದತಿ ಪರಂಪರೆಕ್

ನಂಗಲೇ ಮಾಡುವಕಾಗ

ಪಾಳ್ ಕರ್ತ ಚುಕ್ಕಿ

ಕೊಡವಾಭಿಮಾನ ಬರಡ್

ಎಲ್ಲಾಡ ಮನತ್ ಉಕ್ಕಿ!

- ಚೊಟ್ಟಿಯಂಡಮಾಡ ಲಲಿತಾ ಕಾರ್ಯಪ್ಪ

ಟಿ. ಶೆಟ್ಟಿಗೇರಿ

ತಮಾಸಿ:

## ನಾಡ ಮೊಬೈಲ್ ಕಥೆ..!!!

ಅಂದ್ ಪೊಲಾಕ ನಾನ್ ಕಾಲೇಜ್‌ಕ್ ಎತ್ತುವಕ ಚೆನ್ನ ತಡ ಆಯಿ ಪೋಚಿ. ಸಿಟಲ್ ಈ ಸಾವಡ ಟ್ರಾಫಿ.. ಸಿಗ್ನಲ್ ಹಾವಳಿ ಬುಡುವಾ? ಬಸ್‌ಲ್ ನಾಡ ಪುದಿಯ ಮೊಬೈಲ್‌ನ ನೋಟ್ಯಂಡ್ (ಮನೆಲ್ ನೋಟ್‌ನದ್ ಪೋರತೆ) ಅದಾಂಡ ಕೆಮರಾ.. ಆಪ್ನನ್ ಅಪ್ಲಿಕೇಶನ್... ಆಪ್.. ನೋಟ್ಯಂಡ್ ತಡ ಆಯಿತ್ ಕಾಲೇಜ್‌ಕ್ ಎತ್ತನದ್ ಗೊತ್ತೇ ಆಯಿಲೆ! ನಾಡ ಪುದಿಯ ಮೊಬೈಲ್‌ನ ಪ್ರಂಡ್‌ಕ್ ಕಾಟ್‌ವೀಂದ್ ಎಣ್ಯಂಡ್ ಬಂದಕೋ ಕ್ಲಾಸ್ ಸುರುವಾಯಿತಿಂಜತ್. ಬ್ಯಾಗ್‌ಲ್ ಮೊಬೈಲ್ ಬೆಚ್ಚಂಡ್ ಅಲ್ತಕ ಮನಸ್ಸ್ ಕೇಪಯಿಂಜಿಲೆ. ಒರೊಮ್ಮ ಅದ್‌ನ ಮುಟ್ಟಿ ನೋಟಿಕೊ, ತಿರಾಕಿ ಮರ್‌ಕಿಯಂಡ್ ಲೆಕ್ಟರರ್ ಪಾರ ಕೇಪಯಿಂಜ.

ದಂಡ್ ಪೀರಿಯಡ್ ಕೈಂಜನ್ನಕೆ ಪಕ್ಕತ ಕ್ಲಾಸ್‌ಲ್ ಮಕ್ಕಡ ಕೂತ್ ಪಡ, ಎನ್ನೋ ಆಚೀಂದ್ ಕಳಿಪಂಜದ್ ಗೊತ್ತಾಚಿ. ಅಲ್ಲಿ ಮಕ್ಕಡ ಗುಸು ಗುಸುನ ಕೇಟಿತ್ ಪೋಡಿಯಾಚಿ. ಪ್ರಿನ್ಸಿಪಾಲ್ ಪಿಂಞ ಬೋರೆ ದಂಡಾಳ್ ಲೆಕ್ಟರರ್ಸ್ ಬಂದಿತ್ ಕ್ಲಾಸ್‌ಲ್ ಮಕ್ಕಡ ಬ್ಯಾಗ್‌ಲ್ ಮೊಬೈಲ್ ಉಳ್ಳಾನ ಚೆಕ್ ಮಾಡಿಯಂಡ್ ಕೊಂಡ್ ಪೋಯಂಡಿಂಜತ್! ನಾಡದೋ ಪುದಿಯ ಮೊಬೈಲ್. ಅಪ್ಪವ್ವಂಡ ತಕ್ಕ್ ಕೇಕತೆ ಕ್ಲಾಸ್‌ಕ್ ಎಡ್ಡ ಬಂದದೂ ಆಯಿತ್. ಕ್ಲಾಸ್‌ಕ್ ಮೊಬೈಲ್ ಕೊಂಡ್ ಬಪ್ಪಕಾಗಾಂಡ್ ರೂಲ್ಸ್ ಉಂಡ್. ಸುರು ದಿನ ಇದ್ ಸೀಜ್ ಆಯಿಟಕ.. ಎಣ್ಣುವ ಪೋಡಿಲ್ ಕೈಕಾಲ್ ಓಡ್‌ಲೆ. ಬೋರೆ ಮಕ್ಕಳೂ ತಂಗಡ ಮೊಬೈಲ್‌ನ ಎನ್ನನೆ ಕಾಪಾಡುವ ಎಣ್ಣುವ ಪ್ಲಾನ್‌ಲೇ ಇಂಜತ್.

ಆ ನೇರಕ್ ಸರಿಯಾಯಿತ್ ನಂಗಡ ಕ್ಲಾಸ್ ಎಡ್‌ಪಕ್ ಕಾವೇರಮ್ಮ ಮೇಡಂ ಬಾತ್. ನಂಗ ಮೇಡಂನ ಪೂಸಿ ಪೊಜ್ಜಿತ್, ಮೊಬೈಲ್‌ನ ನಿಂಗಲೇ ಬ್ಯಾಗ್‌ಲ್ ಬೆಚ್ಚೋಳಿಂದ್ ಕೇಟಂಡತ್. ಅಕ್ಕಣೆ ಆ



ಮೇಡಂ.. ನಂಗಡ ಮೀದ ಉರ್ತಕ್ .. ಸ್ಕೂಪ್ ಕಾಟಿಯಂಡ್ ಅದೆಲ್ಲಾ ಆಪುಲೆ. ಪ್ರಿನ್ಸಿಪಾಲ್ ಬಂದಿತ್ ನಾಡ ಬ್ಯಾಗ್ ಚೆಕ್ ಮಾಡಿಟಕ ನಾಕ್ ಪನಿಶ್ ಮೆಂಟ್‌ಂದ್.. ಚೆನ್ನ ಜೋರ್ ಇಟ್ಟತ್! ಬಯ್ಯಂಜಿ ಮನಸ್ಸ್ ಮಾಡಿತ್ ನಂಗಡ ಮೊಬೈಲ್‌ನೆಲ್ಲಾ ತಾಂಡ ಬ್ಯಾಗ್‌ಲ್ ಕೇಟಿತ್ ಬೆಚ್ಚಂಡತ್. ನಂಗಕೂ ಚೆನ್ನ ಧೈರ್ಯ ಬಾತ್. ಆಚೀಂಗಿ ಪ್ರಿನ್ಸಿಪಾಲ್ ಬಪ್ಪಕ ಬ್ಯಾಗ್‌ಲ್ ದಾಡದೇಂಗಿ ಮೊಬೈಲ್ ರಿಂಗ್ ಆಯಿಟಕೋಂದ್ ಪೋಡಿಯೂ ಕೂಡೆ ಸುರುವಾಚಿ!

ಪಾರ ಮಾಡಿಯಂಡಿಪ್ಪಕ ಪ್ರಿನ್ಸಿಪಾಲ್ ಪಿಂಞ ಕೂಟ್‌ಕಾರ ಮೊಬೈಲ್ ರೇಡ್ ಮಾಡುವಕ್ ಬಾತ್. ನಂಗಡ ಎಲ್ಲಾ ಬ್ಯಾಗ್‌ನ ಅಡಿಂಜಿ ಕೊಡಿಕ್ ನೋಟಿತ್ ಚೆಕ್ ಮಾಡ್‌ಚಿ. ಎದೋರ್ ಬ್ಯಾಗ್‌ಲೂ ಮೊಬೈಲ್ ಕಟ್ಟಿಪ್ಪಕ ಪ್ರಿನ್ಸಿಪಾಲ್‌ರ ಮೂಡ್ ಚಪ್ಪೆ ಬುದ್ಧತ್. ನಲ್ಲ ಮಕ್ಕ ಮೊಬೈಲ್ ಎಡ್ಡ ಬಂದಿತಿಲ್ಲೇಂದ್ ಎಣ್ಣಿಯಂಡ್.. ಮೇಡಂರ ಬ್ಯಾಗ್‌ರತ್ತಟಿ ತಿರಿತ್ ನೋಟ್ಯಂಡ್ ನಿಂಗಡ ಬ್ಯಾಗ್‌ಲೆನ್ನೇಂಗಿ ಮೊಬೈಲ್ ಬೆಚ್ಚಂಡಿತುಳ್ಳಿರಾಂಡ್ ಕೇಟಿತ್. ಮೇಡಂ ಕೇಟಿತ್ ಕೇಕತನ್ನಕೆ ಇಲ್ಲೆ ಎಣ್ಣಿಯಂಡ್ ಮೂಡಲ್ ಕರ್‌ಂದೆಳಿ ಕಾಟ್‌ಚಿ. ನಿಂಗಡ ಮೀದ ನಂಬಿಕೆ ಉಂಡ್‌ಂದ್ ಎಣ್ಣಿಯಂಡ್, ಬಂದ ಪ್ರಿನ್ಸಿಪಾಲ್ ಪಿಂಞ ಕೂಟ್‌ಕಾರ ಬಣ್ಣೆ ಕೈಲ್ ವಾಪಾಸ್ ಪೋಚಿ! ಬಯ್ಯಂಜಿ ನಂಗ ನಂಗಡ ಮೊಬೈಲ್‌ನ ಮೇಡಂರ ಕೈಂಜಿ ಕೇಟಂಡತ್! ಪ್ರಿನ್ಸಿಪಾಲ್‌ಕ್ ಮೊಬೈಲ್ ಕೆಣಿಂಜಿತಿಂಜಕ.. ಕಾಲತರ್ ಆವೀರಿ ಪರೀಕ್ಷೆ ಆಕಣೆ ಮೊಬೈಲ್ ಕಟ್‌ವಕಿಂಜಿಲೆ! ಅಲ್ಲಿಂಜಿ ನಾನ್ ಕೋರ್ಸ್ ತೇರಣೆಕೆಯೂ ಕ್ಲಾಸ್‌ಕ್ ಮೊಬೈಲ್ ಎಡ್ಡಂಡ್ ಪೋಯಿಲೆ! ಇದ್ ನಾಡ ಮೊಬೈಲ್ ಕಥೆ!

-ಕಾವೇರಿ

### ಬೆಂಗಳೂರ್‌ಲ್ ಕೊಡವ ಸಂಘಾತ್‌ರ ಸಾಂಸ್ಕೃತಿಕ/ವಿಶೇಷ ಪೆದ ವಿವರ...

- |                   |  |                         |                             |
|-------------------|--|-------------------------|-----------------------------|
| 1. ಕೆ.ಆರ್. ಪುರ    | ಶ್ರೀ ಕಾವೇರಿ ಕೊಡವ ಸಂಘ                   | 8. ಎಚ್‌ಎಎಲ್ 3ನೇ ಸ್ಟೇಜ್  | ಕೊಡವ ಸ್ನೇಹ ಕೂಟ              |
| 2. ವಿದ್ಯಾರಣ್ಯಪುರ  | ಶ್ರೀ ಇಗ್ಗುತಪ್ಪ ಕೊಡವ ಕ್ಷೇಮಾಭಿವೃದ್ಧಿ ಸಂಘ | 9. ವೆಂಕಾಟಪುರ-ಜಕ್ಕಸಂದ್ರ  | ಗೆಜ್ಜೆತಂಡ್ ಕೊಡವ ಸಂಘ         |
| 3. ರಾಜಾಜಿನಗರ      | ಭಗವತಿ ಕೊಡವ ಸಂಘ                         | 10. ವಿಲ್ಸನ್‌ಗಾರ್ಡನ್     | ಗಾರ್ಡನ್ ಕೊಡವ ಸಂಘ            |
| 4. ಸುಲ್ತಾನ್ ಪಾಳ್ಯ | ಶ್ರೀ ವಿಜಯ ಗಣಪತಿ ಕೊಡವ ಸಂಘ               | 11. ಕೂಡ್ಲು ಗೇಟ್         | ಭಗಂಡೇಶ್ವರ ಕೊಡವ ಸಂಘ          |
| 5. ಹನುಮಂತನಗರ      | ಶ್ರೀ ಇಗ್ಗುತಪ್ಪ ಕೊಡವ ಸಂಘ                | 12. ಮುರುಗೇಶ್‌ಪಾಳ್ಯ      | ಬ್ರಹ್ಮಗಿರಿ ಕೊಡವ ಸಂಘ         |
| 6. ಬ್ಯಾಟರಾಯನಪುರ   | ಪ್ರಗತಿ ಕೊಡವ ಸಂಘ.                       | 13. ಮಡಿವಾಳ              | ಲೋಪಾಮುದ್ರೆ ಕೊಡವ ಸಂಘ         |
| 7. ಮಾರುತಿ ಸೇವಾನಗರ | ಪೊಮ್ಮಾಲೆ ಕೊಡವ ಸಂಘ.                     | 14. ರಾಮಮೂರ್ತಿನಗರ        | ನೆಲ್ಲಕ್ಕಿ ಕೊಡವ ಸಂಘ          |
|                   |  | 15. ಕೆಂಗೇರಿ ಕೊಡವ ಒಕ್ಕೂಟ | ಫೀ.ಮಾ. ಕಾರ್ಯಪ್ಪ ಕೊಡವ ಒಕ್ಕೂಟ |



Narayana  
Heart Centre



New BEL Road  
Bangalore



# Cardiac Emergency Care in Minutes

**Heart Attack is a medical emergency. Every minute matters. M S Ramaiah Narayana Heart Centre - Within your reach when you need it the most!**

Our comprehensive emergency cardiac program ensures that every heart, young or old matters and emergencies are attended to within minutes. Whatever be the time, day or night, round the clock emergency services at M S Ramaiah Narayana Heart Centre ensures our expert Cardiologist, Cardiac Surgeons and skilled staff are available to provide necessary treatment. Our Staff work passionately so that the ailing heart doesn't skip a beat.



24/7 Facilities for  
Cardiac Emergencies



Digital Cath Lab



Fully Equipped  
Coronary Care Unit



Cardiac Operation  
Theatre



24/7 Ambulance  
Services

**Cardiac Emergency, Call 080 2218 3444**



Narayana  
Heart Centre



New BEL Road  
Bangalore

## You took the first step right. Take a few more steps for your heart and make it beat a healthy rhythm of life.



### Give up smoking

Smoking is one of the main causes of coronary heart disease. A year after giving up, your risk of a heart attack falls to about half that of a smoker.



### Get your 5 A DAY

Eat five portions of fruit and vegetables a day. Add dried fruit to breakfast cereal, and add vegetables to your pasta sauces and curries.



### Quit secondhand smoking

Secondhand smoke counts too. A recent study found that women who are exposed to other people's smoke increased their risk of heart attacks by 69%, strokes by 56%, and peripheral artery disease (PAD) by 67%, when compared with women who did not hang out around smokers. Clogged arteries in the legs, abdomen, pelvis, arms, and neck are linked with PAD. Tell your friends to quit, too, or make new friends!



### Eat more Fiber

Eating fiber from fruits, vegetables, and grains may help lower your chances of getting heart disease.



### Eat oily fish

Being overweight can increase your risk of heart disease. Stick to a well-balanced diet low in fat and high in fruit and vegetables, combined with plenty of physical activity.



### Manage your weight

Being overweight can increase your risk of heart disease. Stick to a well-balanced diet low in fat and high in fruit and vegetables, combined with plenty of physical activity.



### Walk off stress

If you're feeling under pressure, clear your mind with a walk. It will help put your ideas in order and reduce tension. If it's a brisk walk, it will also count towards your daily activity.



### Find an exercise buddy

Finding an exercise buddy is really important because social support lowers your risk of heart disease and helps you stay motivated," Mosca says. Build up to 60 minutes of exercise a day, but even 20 minutes is better than nothing.



### Cut saturated fat

Small changes to your diet can have positive health benefits. Choose semi-skimmed over full-fat milk, leaner cuts of meat, and steam or grill foods rather than frying.



### Ditch the salt

To maintain a healthy blood pressure, stop using salt at the table and try adding less to your cooking, or cut it out completely. You'll soon get used to it. Also watch out for high salt levels in processed foods. Check the food labels – a food is high in salt if it has more than 1.5g salt (or 0.6g sodium) per 100g.

ವಿಶೇಷ ಎಳ್ತ:

## ನಾನ್ ಕೊಡವತಿ ಕೊಡವ ಬೈಂಬನೇ ಮಂಗಲಾಪಿ..

ಪೊಣ್ಣೆ ನಂದೇಂಗಿ ಆಣ್ ನಂದ್, ಮನ ನಂದೇಂಗಿ ಮನೆ ನಂದ್, ಲೋಕತ್ ಗೆದ್ದ ಬಾಲಂಗಡ ಬೆಂಬರಿಲೋರ್ ಪೊಣ್ಣಾರ ನೈಪು ಇಂಜಿತೇ ಇರೋಂಡು! ನಾಡ ಪೆದ ಪೂವಮ್ಮ ನಾಡ ಮನಸ್ಸೂ ಪೂವಾರನ್ನೆಕೆ ಪವಿತ್ರ ಪಿಂಞ ತೇನ್ ದುಂಬಿತುಂಡ್! ನಾನೋರ್ ಕೊಡವತಿ. ಕೊಡಗರ್ ಕೊಡವಡ ನಲ್ಲಾಮೆಕಾಯಿತೇ ನಾಕ್ ದೇವ ಈ ಪೊಮಾಲೆ ಕೊಡಗಲ್ ಜನ್ಮ ತಂದಿಯೆ. ಅದಲ್ಲೇಂಗಿ ಮೂಡ್ ಸೀಮೆಲ್ ಬಡವತಿಯೋ, ತಂಮಿಳ್ ನಾಡಲ್ ಕೊಂಗತಿಯೋ ಆಯಿತ್ ಪುಟ್ಟಿಪ್ಪಕಿಂಜ. ಸೃಷ್ಟಿಕರ್ತ ಪರಮಾತ್ಮ ಗೊತ್ತಗುರಿ ಇಲ್ಲತೆ ಜೀವರಾಶಿನ ಸೃಷ್ಟಿ ಮಾಡಿತಿಲ್ಲೆ. ಎಲ್ಲಾ ಸೃಷ್ಟಿಕೊ ಓರ್ ಅರ್ಥ, ಗುರಿ ಬೆಚ್ಚಿತ್ ಸೃಷ್ಟಿಕಾರ್ಯ ಮಾಡಿತ್. ಅನ್ನನೆ ಇಪ್ಪಕ್ ಪ್ರಕೃತಿರ ನೇಮತ್ ಬಾಳೊಂಡು. ಇಲ್ಲೇಂಗಿ ವಿರೋಧ ಆಪ.

ಪೂಂಞ್ ನಾಯಿ ವಡಿಯ ಪೊಣ್ಣೆ ಆಪಾ.. ? ಕಾಕೆ ಪದ್ದಕ್ಕೂ ತಂದ್ ಬೆಂದೂರ್ಥ ಆಪಾ? ಕೋಡಂಗಲೂ ಕೊರಿಯಂಗೂ ಮಂಗಲಾನಕ ಎನ್ನನೆ? ಕೊಡವತಿ ಕೊಡಗಲ್ ಪುಟ್ಟಿಯೆ ಕಂಡವನ ಮಂಗಲಾಪಕಾಯಿತ್. ಪಾಲ್ ನೀರಂಜ ಮೇಲ್. ಆಚೇಂಗಿ ಮೀನ್ ಪಾಲ್ ಬದ್ಕುವಾ? ಅದಂಗ್ ನೀರೇ ಬೋಂಡುವಲ್ಲಾ? ಮಂಗಲಾಯಿತ್ ಕೊಡವ ಸಂತತಿ ಬೋಳಿತ್. ಕೊಡವಳ ಉದ್ದಾರ ಮಾಡೊಂಡು ಎಣ್ಣುವ ವಿಶಾಲ ಅರ್ಥತರ ಮೀದ, ನಾನ್ ಕೊಡವನ ಮಂಗಲಾಪಕ್ ನಿರ್ಧಾರ ಮಾಡ್ನಾಂಗ್ ಆಳವಾನ ಗುರಿ ಉದ್ದೇಶ ಉಂಡ್.

ಕೊಡವತಿ ಮೂಡಿಯ, ಕೊರಮನೋ, ಕೊಂಗನೋ ಕೆಟ್ಟಿಯಂಡ್ ಓಡಿ ಪೋನಕ ಕೊಡವ ಬಂಬಂಗಕ್ ಪೊಣ್ಣಾಂಡುವಲ್ಲ..ಅಯಂಗ ಪಾಳ್ ಪರದೇಶಿಯಳ ಕೂಟಿಯ ಬಂದಿತ್ ಸಂಸಾರ ಮಾಡುವ. ಈ ಮಿಶ್ರತಳಿಮಂಡ್ ಯುಗಯುಗತಂಜ ಪವಿತ್ರವಾಯಿತ್ ಬಾಳ್ ಬದ್ಕನ ವೀರ ಧೀರಂಗಡ ಸಂತಾನ ಪುಳು ಮುಯಿತ ಮಾಂಗರನ್ನೆಕೆ ಆಯಿ ಪೋಯಿತ್. ಇಂತಾನೆಲ್ಲಾ ತಡ್ತಿತ್ ಕೊಡವಳ ಕಾಪಾಡಿಯವ. ಓರ್ ಆದರ್ಶ ಜನಾಂಗ ಆಯಿತ್ ಕಾಪಾಡಿಯವ ಉದ್ದೇಶಕಾಯಿತ್ ನಾನ್ ಕೊಡವನೇ ಮಂಗಲಾಪ. ನಾನೋರ್ ಕೊಡವಂಡ ಪೊಣ್ಣಾಂಡು. ನಾನೋರ್ ಕೊಡವತಿ ಅವ್ವನಾಂಡು. ಅಪ್ಪಟ ಕೊಡವತಿ ಮಾಂವಿ, ತಾಯಿಯಾಯಿತ್ ಕೊಡವಾಮೆನ ಪೋತೋಂಡು. ಕೊಡಗರ್ ಕೇಳಿನ ಲೋಕಕ್ ಪಬ್ಬಾಚಿಡಂಡು.

ಕೊಡವ ಬಾಲೆಕಾರ ಅಪ್ಪ ನೇಡ್ನಾನ ತಿಂದಂಡ್ ಕಾರಲ್ ಸುತ್ತಿಯಂಡ್, ಬಾರಲ್ ಕಳ್ಳಕುಡ್ಚಂಡ್ ಕ್ಲಬಲ್ ಇಸ್ಪೇಟ್ ತಟ್ಟಿಯಂಡ್, ಬೆಂಗಲೂರ್, ಮೈಸೂರ್ಲ್ ಸುತ್ತಿಯಂಡ್ ದಿನ ಕಯಿಪಂತ ಬಟ್ಟೆ ತಪ್ಪನಯಿಂಗ ಆಯಿತ್ಂದ್ ಜನ ಪರಿಯುವ. ಕೊಡವ ಬಾಲೆಕಾರಡ ಬದ್ಕ, ನೂಲ್ ತುಂಡ್ನ ಗಾಳಿಪಟತರನ್ನೆಕೆ ಗೊತ್ತಗುರಿ ಇಲ್ಲತಾಯಿತ್ಂದ್ ಎಣ್ಣುವ. ಕೊಡವ ಬಾಲೆಕಾರಡ ಶಿಸ್ತ, ನೀತಿ ನೇಮ ಇಲ್ಲತೆ ಪಾಳಾಯಂಡ್ ಉಂಡ್ಂದ್ ನಂಗಡ ಪರಿಯವು ಎಣ್ಣುವಾನ ಕೇಟಿಯೆ. ಆಚೇಂಗೂ

ಈ ಕೊಡವ ಬೈಂಬಂಗ ಎನ್ನಂಗ್ ಇನ್ನನೆ ಆಚೇಂದ್ ಕಾರಣ ಕಂಡ್ ಪುಡ್ಚವು ಇಲ್ಲೆ! ಬಟ್ಟೆ ತಪ್ಪನಯಿಂಗಳ ಎನ್ನನೆ ನಲ್ಲ ಬಟ್ಟೆಕ್ ಕೂಟುವೋಂದ್ ಪ್ರಯತ್ನಪಟ್ಟವು ಇಲ್ಲೆ. ಅದಂಗಾಯಿತೇ ನಾನ್ ಕೊಡವ ಕ್ಷಣನೇ ಬಾಕೆ ಕೂಡುವಿ. ಅದತೂ ಬಾಳ್ ಬದ್ಕರ್ ಅಡ್ಡ ಬಟ್ಟೆಲುಳ್ಳವನೇ ಕೂಡುವಿ! ಅವನ ಸೆರಿ ಬಟ್ಟೆಕ್ ಕೂಟೋಂಡು.

ಬಾಲೆಕಾರಕ್ ಅಪ್ಪವಂಗಡ ಸೆರಿಯಾನ ಮಾರ್ಗದರ್ಶನ ಇಪ್ಪುಲೆ. ಅಂಥಾ ಬಾಲೆಕಾರಡ ಮನಸ್ಸನ ಅರ್ಜಿತ್ ಅವಂಡ ಸಮಸ್ಯೆಕ್ ಪರಿಹಾರ ಕೊಡಪುಲೆ. ಅಂಥ ಮಕ್ಕ ಕಳ್ಳ ಕುಡಿ, ಇಸ್ಪೇಟ್ಲ್ ತೃಪ್ತಿ ಪಡುವ. ಇದಲ್ಲಾಂಗಿಂಜಿ ಮೀತ ತೃಪ್ತಿನ ಪೊಣ್ಣಾನಯಿಂಗ ಕೊಡತಿತ್ ನಲ್ಲ ಬಟ್ಟೆ ಕಾಟುವಕಯ್ಯುಲೆಯಾ? ಇಂತಾ ಪ್ರಯೋಗಕಾಯಿತೇ ನಾನ್ ಕೊಡವನೇ ಕೂಡುವೋ.

ನಾನ್ ಕೈ ಪುಡಿಚ ವಡಿಯ ಚಾಂದ್, ಬೂಟಿ ಮರ ಕಪ್ಪಂವನೇ ಆಯಿತಿರಡ್! ನಾನ್ ನೋಟ್ವಿ. ಅವೋ ಎನ್ನನೆ ಇಂಥಾ ಚಾಲ್ಕ್ ಇಳಿಯುವಾಂದ್! ಕಳ್ಳ ಕುಡಿಯನೋ, ಕುದರೆ ಜೂಜ್ಕಾರನೋ ಆಯಿತಿರಡ್ ನೋಟನ, ಅವೋ ಎನ್ನನೆ ಇನ್ನತಾಲೆಲ್ಲಾ ದಿನ ಕಯಿಪಾಂದ್. ನಾಡ ವಡಿಯಂಡ ನಳತರನ್ನೆಕೆ ಇಂಜಂಡ್ ಅವಂಡ ತಡಿರ, ಮನಸ್ಸರ ಆರೈಕೆ ಮಾಡಿತ್ ಪ್ರೀತಿ ಪ್ರೇಮತ್ ಗೆಲ್ಲುವಿ. ಅವಂಡ ಜವಾಬ್ದಾರಿಕೆರ ಪಾದಿನ ನಾನ್ ಪೊರ್ಪಿ! ಪೇಟೆ ಬಾರ್, ಕ್ಲಬಲ್ ಕಟ್ಟುವ ತಾತ್ಕಾಲಿಕ ಸುಖಕಿಂಜ ಮೀತ ಸುಖಶಾಂತಿ ತೃಪ್ತಿನ ಮನಲ್ ಕೊಡತಕ ಅದೆನ್ನನೆ ಪೊರ್ಮೆ ಪೋಪಾ ನೋಟುವಿ!

ಬೇಲ್ನ ಇಂಜಿಕ್ ಕೊಡತಂಡ್ ಎನ್ನನೆ ಪೇಟೆ ಸುತ್ತುವಾ, ನೋಟುವಿ, ಜಮ್ಮಾ ಜಾಗ ಮಾರಿತ್ ಎನ್ನನೆ ಮೈಸೂರ್ ಬೆಂಗಲೂರ್ ನಗರತರ ಬಾಳ್ಕೆತ್ತುವಾ ನೋಟುವಿ! ಜಮ್ಮಾ ಮಾರುವೇಂಗಿ ಮಿಂಞ ಅಪ್ಪವ್ವನ ಪಿಂಞ ಪೊಣ್ಣೆನ ಮಾರ್, ಅಲ್ಲಿಂಜ ಮಕ್ಕಳ ಮಾರ್ಂದ್ ಹರಪುಡಿಪಿ. ಏದಂಗೂ ಬಗ್ಗತ ಪೋಚೇಂಗಿ ಸಾಮ, ದಾನ, ಭೇದ ದಂಡ ನಾಲ್ ತಂತ್ರತನೋ ಬಳಸುವಕ್ ಮಾತ್ರ ನಾನ್ ಬಯ್ಯಕ್ ನಿಪ್ಪವಳಲ್ಲ!

ನಾನ್ ಕೈಪುಡಿಚ ವಡಿಯನ ಓರ್ ಆದರ್ಶ ಕೊಡವನಾಯಿತ್ ಮಾಡೊಂಡು. ಓರ್ ಕ್ಷಣ್ಣ, ಓರ್ ಮೂಡಿ ಕುಂಞಿನ ಪೆತ್ತಿತ್, ಆ ಕುಂಞಿಯಳ ಆದರ್ಶ ಕೊಡವನಾಯಿತೂ, ಕೊಡವತಿಯಾಯಿತೂ ಬೋಳತೋಂಡು. ನಾಡ ಮನನ ಓರ್ ಆದರ್ಶ ಕೊಡವ ಸಾಂಸ್ಕೃತಿಕ ಕೇಂದ್ರ ಮಡೋಂಡು. ನಾಡ ಮಾಂವ, ಮಾಂವಿನ ಬಾವ ಮಚ್ಚಣಂಗಲೆಲ್ಲಾ ಪ್ರೀತಿ ವಿಶ್ವಾಸತ್ ಗೆದ್ದಿತ್ ಪಂಡೇತ ಕೊಡವ ಪದ್ಧತಿ ಪರಂಪರೆಕ್ ಪುನರ್ಜೀವ ಕೊಡಕೊಂಡು. ನಾಡ ವಡಿಯನ ನೋಟಿತ್ ಜನ ಗೌರವತ್ ಮಂಡೆ ತಾತೋಂಡು. ನಾಡ ಮಕ್ಕಡ ಏಳಿಗೆ ನೋಟಿತ್ ಊರ್ ಕೇರಿರ ಕೊಡವ ಮಕ್ಕ ಅಯಿನ ಅನುಕರಣೆ ಮಾಡೊಂಡು. ಬಾಯಿ ತೊಂದೆವೆಲ್ಲಾ ಪೂವಮ್ಮಂಡ ಸಂಸಾರ ಎನ್ನನೆ ಉಂಡ್ ನೋಟಿ. ಅವಡ ಬೇಲ್ಲ್ ಬೊಳೆ, ಜಮ್ಮ

ಬಾಣೆಲ್ ಮಾಡ್‌ನ ಕಾಫಿ ತೋಟತ್‌ನ ನೋಟಿ, ವಡಿಯನೂ ಪೊಣ್ಣು ಬೇಲ್ ತೋಟತ್ ಒಂದಾಯಿ ನೈಪಾನ ನೋಟಿ, ಆ ಮನೆಲ್ ಬೆಂದು ತಕ್ಕಾರ ನೋಟಿ. ಮನೆರ ಮಕ್ಕಡ ವಿದ್ಯಾಭ್ಯಾಸತ್‌ರ ಮಟ್ಟ ನೋಟಿ. ಒಟ್ಟಾರೆ ಪೂವಮ್ಮಂಡ ಮನೆಲ್ ಲಕ್ಷ್ಮೀ ಸರಸ್ವತಿ ದಂಡಾಳೂ ಪಡ್ ಬುದ್ಧಿತಿಂದ್ ಪರೆಯೋಂಡು. ಪರಂದಕ ಪೋರ, ನಾಡ ವಡಿಯನ ನೋಟಿತ್ ಬೋರೆ ಕೊಡವ ನಂಗಡ ಪರವಾಲಂಬನೆ, ಸಮಾಜ ದ್ರೋಹ ಚಟುವಟಿಕೆಲ್, ಬೋಂಡತ ಒಣ ಜಂಬತ್‌ನೆಲ್ಲಾ ಬುಟ್ಟಿತ್ ಆದರ್ಶ ಕೊಡವಳಾಂಡು. ಅನ್ನನೆ ಮಾಡುವಕಾಯಿತ್ತೇ ನಾನ್ ಕೊಡವನೇ ಕೊಡುವೀಂಡ್ ಉದ್ದೇಶ.

ಕೊಡವಡಲ್ಲಿ ಇಕ್ಕಿಕ್ಕ ದುಂಬಿ ಪೋನ ಅನಿಷ್ಟ ಪದ್ಧತಿನ ನೀಕುವಿ. ಪಂಡೇತ ಪದ್ಧತಿ ಪೊಲೆ ನಾಡ ಮಂಗಲ ಕೈಪಾಚಿಡಾವಿ. ಊರ್ ಕೂಡವಲ್ಲಿಂಜ ಮಂಗಲ ಇಳಿಯಣೆ ದುಡಿ ಕೊಟ್ಟ ಪಾಟ್‌ಕೇ ಮುಂಬ! ಬಾರ್ ಬಫೆಲ್ ತೆರ್ತ ಇಗ್ಗಿರುವಂಜಿ ಕಾರಿಯಂಡ್ ತೂರಿಯಂಡ್ ಪೋಪಂತ ನೀತಿಕೆಟ್ಟ ಕೊಡವಕೆಲ್ಲಾ ನಾಡ ಮಂಗಲತ್ ಜಾಗ ಇಲ್ಲ! ಬಫೆ ಬೆಚ್ಚಿತ್ ಜಡ್ಡಕ್ ಪದ್ ಬೂವನ್ನಕೆ ಮಾಡುಲೆ! ನೀರೆಡ್‌ಪಲ್ಲಿ ಪದ್ಧತಿ ಪೋಲೆ ಆಡುವ ಬಾವ ಮಚ್ಚಿಣಂಗ ಆಡಡ್. ಕುಶಿಪಡಡ್. ಕಳ್ಳ ಕುಡ್‌ಚಂಡ್ ಕಿಂಜಂಡ್ ಆಡವಯಿನ ಪಡನೆಟ್ಟಿ ಪುಡಚಿ ತಳ್ಳುವಕುಳ್ಳಂತ ಪತ್ತ್ ಮರ್ಯಾದಸ್ತ ಕೊಡವ ಬಾಲೆಕಾರಡ ಪಡೆನ ತಯಾರ್ ಮಾಡಿ ಬೆಚ್ಚಿತಿಪ್ಪಿ! ಪಂಡ್ ಇಲ್ಲತಿಂಜ ಬೆಂದೂಟಂದೆಣ್ಣುವ ಊಟತ್ ಚೋಲ್ ಇಲ್ಲತ ಮಾಡುವಿ! ಇಲ್ಲತ ನಡಪು ಬೋಂಡತ ಕಳಿ ಕಳಿಪವು ನಾಡ ಮಂಗಲಕ್ ಬಪ್ಪಕ್ ಬೇರಾಚಿಡೋಂಡು. ತಪ್ಪಿ ನಡಂದಕ ತಮ್ಮಾವನಾಚೇಂಗಿಯು ಬಂದ ಬಟ್ಟಿ ಕಾಟ ಕೊಡಪಾಚಿಡಾವಿ.

ವಡಿಯ ಕೈಪುಡಿಚಿತ್ ಒಪ್ಪಿತ್ ಸಮ್ಮಂಧ ಪರಂದಿತ್ ತಾನೂ ನೇರೆ ಕಟ್ಟೋಳೆ ಕಡಂದಪಿಂಞ ಬಾಮನೆಲ್ ಕೊಡವಡ ನೇರಾನ ಶಿಸ್ತ ನಡಪುನ ಬೊಳತುವಿ. ಇದಂಗಾಯಿತ್ತೇ ನಾನ್ ಕೊಡವ ಬೈಂಬನ ಬಾಕೆ ಕೂಡುವಿ.

ಕೊಡವ ವೀರಂಗಳನ್ನೆ, ಅಕ್ಕ ಕೊಡವತಿಯ ಹೇಡಿಯಾ. ಅಲ್ಲಾ ..! ಆಣ್‌ರನ್ನಕೇ ಪೊಣ್ಣು ವೀರಮಾತೆ, ಅನ್ಯಾಯ ಅನಾಚಾರ ಕಂಡಲ್ಲಿ ಕತ್ತಿ ಎಡ್ಕಂಡಿಯಲ್ಲಿ ಕತ್ತಿ, ತೋಕ್ ಎಡ್‌ಪಲ್ಲಿ ತೋಕ್ ಎಡ್ಡಕೊಂದೂ ನಾನ್ ಬಯ್ಯಕ್ ನಿಪ್ಪವಳಲ್ಲ! ಓರ್ ಕೊಡವ ಬೈಂಬನ ಕೈಪುಡ್‌ಚಕ ಮಾತ್ರ ನಾಡ ಈ ಗುರಿ ಸಾಧನೆ ಮಾಡೋಲು. ಅದ್ ಬುಟ್ಟಿತ್ ಬೋರೆ ಜಾತಿಕಾರಂಡ ಬಯ್ಯ ಓಡಿಪೋನ ಕೊಡವತಿ ಮೂಡಿಯಕ್ ಇನ್ನನೆ ಬಾಳರ ಗುರಿ ಸಾಧನೆ ಮಾಡುವಕ್ ಕಯ್ಯುವಾ? ಅದಂಗಾಯಿತ್ತೇ ಬಡವನಾಚೇಂಗಿಯೂ ನಾನ್ ಕೊಡವ ಬೈಂಬನೇ ಬಾಕೆ ಕೂಡುವಿ!

‘ಕೊಡಗ್ ಆರಬೇರ’  
-ಬಾಚರಣಿಯಂಡ ಪಿ. ಅಪ್ಪಣ್ಣ ಪಿಂಞ ರಾಣು ಅಪ್ಪಣ್ಣ ಕುಶಾನಗರ

## ಬೆಂಗಳೂರ್ ಕೊಡವ ಸಮಾಜತ್ ಪೊಮ್ಮಕ್ಕಕ್ ಬೊನ್‌ಸಾಯಿ ವರ್ಕ್‌ಶಾಪ್



ಬೆಂಗಳೂರ್ ಕೊಡವ ಸಮಾಜತ್ ಪೊಮ್ಮಕ್ಕಡ ಸಮಿತಿಕಾರ ತಾ. 18.12.2015ಂದ್, ಕಾವೇರಿ ಹಾಲ್‌ಲ್, ಪಾಂಡಂಡ ಕಮಲು ಮುತ್ತಪ್ಪಂಡ ಅಧ್ಯಕ್ಷತೆಲ್, ಕೊಡವ ಸಂಘತ್‌ರ ಪೊಮ್ಮಕ್ಕಕ್ ಬೊನ್‌ಸಾಯಿ ಕ್ರಿಯೇಶನ್ ಪಿಂಞ ಟೆರೇಸ್ ಗಾರ್ಡನಿಂಗ್ ಪಡಿಪು ಶಿಬಿರ(ವರ್ಕ್ ಶಾಪ್) ಏರ್ಪಡ್ತಚಿ. ಈ ಸಂದರ್ಭತ್ ಕೊಡವ ಸಮಾಜ ಉಪಾಧ್ಯಕ್ಷಿಣಿ ಮುಕ್ಕಾಟಿರ ವಾಣಿ ನಾಣಯ್ಯ ಪಿಂಞ ಸಹಕಾರ್ಯದರ್ಶಿ ಮಾಚಿಟ್ಟಿರ ಎಂ. ಡಾಲು ಕೂಡಿಯಾಡ್‌ಚಿ. ಪಾಂಡಂಡ ಕಮಲು ಮುತ್ತಪ್ಪ ತಕ್ಕಾರ ಬಯಂದಿತ್, ವರ್ಕ್ ಶಾಪ್‌ರ ಬಗ್ಗೆ ವಿವರಚಿಟ್ಟತ್. ಉದ್ಯಮಿ ಕೋಣೇರಿರ ವನಿತಾ ಚಂಗಪ್ಪ ಪೊಮ್ಮಕ್ಕಕ್ ಬೊನ್‌ ಸಾಯಿ ಪಿಂಞ ಟೆರೇಸ್ ಗಾರ್ಡನಿಂಗ್‌ರ ಬಗ್ಗೆ ವಿವರಚಿಟ್ಟತ್. ಅಮ್ಮಂಡ ತಾರಾ ದೇವಯ್ಯ ತರಕಾರಿ-ಪಣ್ಣರ ತೋಲ್‌ನ ಬಳಸಿತ್ ಕಾಂಪೋಸ್ಟ್ ಗೊಬ್ಬರ ಮಾಡುವಾಂಡ ವಿಷಯತ್ ತಕ್ಕ ಪರಂದತ್. ಸಮಿತಿ ಕಾರ್ಯದರ್ಶಿ ಮೇದುರ ವಿಶಾಲು ಕುಶಾಲಪ್ಪ ಆಖೀರಿಲ್ ವಂದನೆ ಬಯಂದತ್.

### ತಮಾಸಿ

ಮಂಗಲಾಕಣೆಕೆಯೂ ನಾಕ್ ಕುಸಿ ಎಣ್ಣುವದ್ ಗೊತ್ತೇ ಇಂಜಿಲೆ. ಮಂಗಲಾನದು ಗೊತ್ತಾಚಿ. ಆಚೇಂಗೆನ್ನ ಪ್ರಯೋಜನ, ಅಕ್ಕಣೆ ಸಮಯ ಮೀರಿ ಪೋಯಿತಿಂಜತ್..!!!

ಬೆಂಗಳೂರ್ ಕೊಡವ ಸಮಾಜ  
www.kodavasamajabangalore.in  
Email: kodavasamajblr@gmail.com

## ಶ್ರೀ ಕಾವೇರಿ ಸ್ಕೂಲ್ಸ್ ಮಕ್ಕಳ ದಿನಾಚರಣೆ

ತಾ.14.11.2015ಂದ್ ಪೊಲಾಕ ಶ್ರೀ ಕಾವೇರಿ ಸ್ಕೂಲ್ಸ್ ಮಕ್ಕಳ ದಿನಾಚರಣೆ ನಡತ್‌ಚಿ. ಪ್ರಿನ್ಸಿಪಾಲ್ ಗೀತಾ ಎಂ ರಾವ್, ವೈಸ್ ಪ್ರಿನ್ಸಿಪಾಲ್ ಪಳಂಗಂಡ ಗೌರಿ ಕುಮಾರಿ ಪಿಂಞ ವಿದ್ಯಾರ್ಥಿ ನಾಯಕಂಗ ಕೂಡಿತ್ ಕಾರ್ಯಕ್ರಮ ಉದ್ಘಾಟನೆ ಮಾಡ್‌ಚಿ. ಮಕ್ಕಳ ಉಪಾದ್ರಿಯಕ್ ತರಾವರಿ ಮನೋರಂಜನೆ ಕಾರ್ಯಕ್ರಮ ಮಾಡಿತಿಂಜತ್.



**ಕೊಡವಕೋರ್ ಶಾಶ್ವತ ನೆಲೆ ಕಂಡವ ನ್ಹಟ್ಲ್:**  
**ಇಕ್ಕ್ ಆಫೀಸ್, ಮಿಇಟ್ ಸಾಂಸ್ಕೃತಿಕ ಕೇಂದ್ರ**



ಸ್ಥಾಪಕಾಧ್ಯಕ್ಷ ಮನೆಯಪಂಡ ಡಬ್ಲ್ಯೂ. ಅಯ್ಯಪ್ಪ, ಇಕ್ಕ್ತ ಅಧ್ಯಕ್ಷ ಚೆಕ್ಕಿರ ಪಿ. ಸೋಮಯ್ಯ, ಉಪಾಧ್ಯಕ್ಷ ಜಮ್ಮಡ ಮೋಹನ್ ಕೂಡೆ ಗೌ. ಕಾರ್ಯದರ್ಶಿ ಸಣ್ಣವಂಡ ಪಿ. ವಿಶ್ವನಾಥ, ಖಜಾಂಚಿ ಚೊಟ್ಟಿಯಂಡಮಾಡ ಡಿ. ಮಾದಪ್ಪ, ಖಾಯಂ ಆಹ್ವಾನಿತ ಅಜ್ಜಿನಿಕಂಡ ಸಿ. ಮಹೇಶ್ ನಾಚಯ್ಯ, ನಿರ್ದೇಶಕಂಗಲಾನ ಕಳ್ಳಿಚಂಡ ರಾಬಿನ್ ಸುಬ್ಬಯ್ಯ, ಬಲ್ಲಣಮಾಡ ರೀಟ ದೇಚಮ್ಮ, ಚಿರಿಯಪಂಡ ಇಮ್ಮಿ ಉತ್ತಪ್ಪ, ನಾಮರ ದೇವಯ್ಯ, ಕೊಕ್ಕಂಡ ಕುಶ ಬಿದ್ದಪ್ಪ, ಕುಪ್ಪಂಡ ಗಣೇಶ್, ಕಳ್ಳಿಚಂಡ ಗಯ, ಚೆಪ್ಪುಡಿರ ಪೃಥ್ವಿ, ಇನ್ನತಯಿಂಗಳ ಕಾಂಗೊಲು.

**ಗೋಣಿಕೊಪ್ಪತ್**  
**'ಕೊಡವ ಸಾಂಸ್ಕೃತಿಕ ಕೇಂದ್ರ'**

ಗೋಣಿಕೊಪ್ಪ ಕೊಡವ ಸಮಾಜಕಾರ 2013ಲ್ ಕೈಕೇರಿಲ್ 5 ಏಕರೆ ಜಾಗತ್‌ನ 15 ಲಕ್ಷ ಉ.ಕ್ ಎಡ್ಡತ್. ಅಲ್ಲಿ ಇದಿಕ್ಕ ಸುಮಾರ್ 10 ಕೋಟಿ ಉರ್‌ಪಿಯ ಖರ್ಚಲ್ ಬಲ್ಯ ಮಂಗಲ ಹಾಲ್ ಕೂಡ್‌ನನೆಕೆ 'ಕೊಡವ ಸಾಂಸ್ಕೃತಿಕ ಕೇಂದ್ರ' ಕೆಟ್ಟುವಕ್ ಯೋಜನೆ ಮಾಡ್ಯಂಡುಂಡ್. ಇದೇ ಜಾಗತ್ ತಾ. 17.12.2015ಂದ್ ಅಂದಾಜ್ 13 ಲಕ್ಷ ಉ.ಖರ್ಚಲ್ ಕೆಟ್ಟನ ಕೊಡವ ಸಮಾಜ ಕಚೇರಿನ, ಸಾಂಸ್ಕೃತಿಕ ಕೇಂದ್ರತ್ ಅಧ್ಯಕ್ಷ ಚೆಕ್ಕಿರ ಸೋಮಯ್ಯಂಡ ಅಧ್ಯಕ್ಷೇಲ್ ಸ್ಥಾಪಕಾಧ್ಯಕ್ಷ ಮನೆಯಪಂಡ ಡಬ್ಲ್ಯೂ. ಅಯ್ಯಪ್ಪ ತೊರಂದತ್. ಅದಾನದು ಸಭೆಲ್, ಚೇಂದಂಡ ಸುಮಿ ಸುಬ್ಬಯ್ಯ ಪ್ರಾರ್ಥನೆ ಮಾಡ್‌ನದು, ಆಹ್ವಾನಿತ ನಿರ್ದೇಶಕ ಅಜ್ಜಿನಿಕಂಡ ಮಹೇಶ್ ನಾಚಯ್ಯ ಸ್ವಾಗತ ಬಯಂದತ್. ಬಲ್ಲಣಮಾಡ ರೀಟಾ ಅಪ್ಪಯ್ಯ ವರದಿ ಒಪ್ಪುಚಿಟ್ಟತ್. ಖಜಾಂಚಿ ಚೊಟ್ಟಿಯಂಡಮಾಡ ಡಿ. ಮಾದಪ್ಪ ಲೆಕ್ಕಪತ್ರನ ಸಭೆಕ್ ಬೆಚ್ಚತ್. ಆಖೀರಿಲ್ ನಿರ್ದೇಶಕ ಕಳ್ಳಿಚಂಡ ರಾಬಿನ್ ಸುಬ್ಬಯ್ಯ ವಂದನಾರ್ಪಣೆ ಮಾಡ್‌ಚಿ. ಗೋಣಿಕೊಪ್ಪ ಸಮಾಜತ್ ಇಕ್ಕ್ ಸುಮಾರ್ 1350 ಸದಸ್ಯಂಗ ಉಂಡ್.

ಮಕ್ಕಳ ಕೊಡವ ತಕ್ಕ ಪಡಿಕಂಡು..



## ಬಾಳೆಗೋಡ್ಲ್ ನಾಲನೇ ಕೊಡವ ನಮ್ಮೆ ಬೆಂಗಳೂರ್ ಸಮಾಜ ಟೀಂಕ್: ಹಾಕಿ ಕಪ್



ಬೆಂಗಳೂರ್ ಕೊಡವ ಸಮಾಜ ಟೀಂ, ಕೊಡವ ಸಮಾಜ ಒಕ್ಕೂಟತರ್ ಆದನೆಲ್ ಬಾಳೆಗೋಡ್ಲ್ ನಡಂದ 4ನೇ ಕೊಡವ ನಮ್ಮೆಲ್ ಸಾಂಸ್ಕೃತಿಕ ಪೈಪೋಟಿಲ್ ಏರ ಇನಾಮು ಪಡಂದಿತ್. ಮೈಸೂರ್ ಕೊಡವ ಸಮಾಜ ಚಾಂಪಿಯನ್ ಆಯಿತ್. ದಂಡನೇ ಸ್ಥಾನತ್ ಬೆಂಗಳೂರ್ ಕೊಡವ ಸಮಾಜ ಸಾಧನೆ ಮಾಡಿತ್. ಹಾಕಿ ಪೈನಲ್ಸ್ ಗೋಣಿಕೊಪ್ಪ ಕೊಡವ ಸಮಾಜ ಟೀಂನ, ಬೆಂಗಳೂರ್ ಕೊಡವ ಸಮಾಜ ಟೀಂ 2-0 ಗೋಲ್ಲ್ ಗೆದ್ದಿತ್, ಇರ್ವದಾಯಿರ ನಗದ್ ಇನಾಮು, ಟ್ರೋಫಿ ಪಿಂಞ ರೋಲಿಂಗ್ ಟ್ರೋಫಿ ಪಡಂದಂಡತ್. ಗೋಣಿಕೊಪ್ಪ ರನ್ನರ್ಸ್ ಟೀಂಕ್ ಪತ್ತಾಯಿರ ನಗದ್ ಇನಾಮು ಪಿಂಞ ಟ್ರೋಫಿ ಎಡ್ಡತ್. ಕೇರ್ ಬಲಿಲ್ ಸಮಾಜ ಪೊಮ್ಮಕ್ಕಡ ಟೀಂ ದಂಡನೇ ಸ್ಥಾನ ಪಡಂದತ್.



ಬೆಂಗಳೂರ್ ಕೊಡವ ಸಮಾಜತರ್ಡಿಲ್ ವಿವೇಕನಗರ ಉಮ್ಮತಾಟ್ಲ್, ಅದಾನದು ಪೀಣ್ಯ ದಾಸರಳ್ಳಿ ಕೊಡವ ಸಮಾಜಕಾರ ಸಮ್ಮಂಧ ಅಡಕುವಾತ್ ಪಿಂಞ ಕಪ್ಪೆಯಾಟ್ಲ್ ಒಂದನೇ, ಬೊಳಕಾಟ್ಲ್ ಪಿಂಞ ಕತ್ತಿಯಾಟ್ಲ್ ದಂಡನೇ ಸ್ಥಾನ ಅಲ್ಲತೆ ಕೋಲಾಟ್ಲ್ ಮೂಂದನೆ ಸ್ಥಾನ ಪಡಂದಿತ್ ನಲ್ಲ

ಸಾಂಸ್ಕೃತಿಕ ಬಲತನ ಕಾಟಿತ್. ಕೇರ್ ಬಲಿಲ್ ನಾಪೋಕ್ಲ್ ಕೊಡವ ಸಮಾಜತರ್ ಪೊಮ್ಮಕ್ಕಡ ಟೀಂ ಪಿಂಞ ವೀರಾಜಪೇಟೆ ಕೊಡವ ಸಮಾಜತರ್ ಆಮಕ್ಕಡ ಟೀಂ ಒಂದನೇ ಇನಾಮು ಪಡಂದತ್.



**ಪೀಣ್ಯ ದಾಸರಳ್ಳಿ ಕೊಡವ ಸಮಾಜತ್ ಪುತ್ತರಿ**



ಬೆಂಗಳೂರ್ ಪೀಣ್ಯ ದಾಸರಳ್ಳಿ ಕೊಡವ ಸಮಾಜತ್ ತಾ.5.12.2015ಂದ್ ಬೈಟಾಪಕ, ಸಮಾಜ ಅಧ್ಯಕ್ಷ ಅರಮಣಮಾಡ ಶಂಕರಿ ಕಾರ್ಯಪ್ಪಂಡ ಮುಂದಾಳ್ತನತ್ ಪುತ್ತರಿ ನಮ್ಮೆ ನಡಂದತ್. ಸುರೂಲ್ ನೆಲ್ಲಕ್ಕಿಲ್ ಬೋಟೋಳಂಡ ಅಯ್ಯಪ್ಪ ತಕ್ಕ ಪರಂದತ್. ನಾಪಂಡ ಪಟ್ಟು ಕುತ್ತಿ ಎಡ್ಡಿತ್, ಪದ್ಧತಿ ಪೋಲೆ ಕಾರ್ಬಾರ್ ನಡ್ಚಿ. ಸಾಂಸ್ಕೃತಿಕ ಕಾರ್ಯಕ್ರಮ ನಡ್ಚಿ. ಬಯ್ಯಂಜಿ ಕಡೇಮಾಡ ಸುಬ್ಬಯ್ಯಂಡ ಅಧ್ಯಕ್ಷತೆಲ್ ಸಭೆ ಕೂಡ್ಚಿ. ಕಲ್ಲುಮಾಡಂಡ ಯಶು ಕುಶಾಲಪ್ಪ ಪ್ರಾರ್ಥನೆ ಮಾಡ್ಚಿ. ಪರಿಯವು ತಕ್ಕ ಪರಂದತ್. ಆಖೀರಿಲ್ ಕಾರ್ಯದರ್ಶಿ ಕೊಪ್ಪಿರ ವಿನು ಅಯ್ಯಪ್ಪ ವಂದನಾರ್ಪಣೆ ಮಾಡ್ಚಿ. ಕಾರ್ಯಕ್ರಮ ನಿರೂಪಣೆ: ನಂಬಿಯಪಂಡ ರಿಚ ನಾಣಯ್ಯ ಪಿಂಞ ತೀತರಮಾಡ ಆಕಾಶ್ ಪೂಣಚ್ಚಿ.

\*\*\*\*\*

**ಲೋಪಾಮುದ್ರೆ ಒತ್ತೋಮೆ + ಮಾಸಭೆ**

ಬೆಂಗಳೂರ್ಲ್, ಮಡಿಮಾಳ ಏರಿಯಾ ಲೋಪಾಮುದ್ರೆ ಕೊಡವ ಸಂಘತ್ ಕಾಲತ್ ಮಾಸಭೆ ಕಯಿಂಜ ತಾ. 5.12.2015ಂದ್ ಪಿಂಞ ಒತ್ತೋಮೆ ಕೂಟ ತಾ. 6.12.2015ಂದ್, ಎಚ್‌ಎಸ್‌ಆರ್ ಲೇಔಟ್ ಲಾರೆನ್ಸ್ ಸ್ಕೂಲ್ಲ್, ಬೂವಡಿರ ಎಂ. ಗಣಪತಿರ ಅಧ್ಯಕ್ಷತೆಲ್ ನಡಂದತ್. ಒತ್ತೋಮೆ ಕೂಟಕ್ ಕೊಡವ ಸಮಾಜ ಅಧ್ಯಕ್ಷ ಮಂಡೇಡ ಎ. ರವಿ ಉತ್ತಪ್ಪ ಪಿಂಞ ಕಾರ್ಯದರ್ಶಿ ಚೆನ್ನಪಂಡ ಕೆ. ರವಿ ಸುಬ್ಬಯ್ಯ ಮುಖ್ಯಬೆಂದುವಳಾಯಿತ್ ಬಂದಿತಿಂಜತ್.

ಪೊಲಾಕ ಕಳಿ ಕೂಟ ಏರ್ಪಡ್ತಿಂಜತ್. ಸಭೆ ಕೂಡ್‌ನದು, ಪಾಂಡಂಡ ಕವಿತಾ ಚಿಣ್ಣಪ್ಪ ಪ್ರಾರ್ಥನೆ ಮಾಡ್‌ನದು, ಅಧ್ಯಕ್ಷ ಬೂವಡಿರ ಎಂ.ಗಣಪತಿ ಸ್ವಾಗತ ಬಯಂದತ್. ಬೂವಡಿರ ಸುನಿತ ಬೋಪಣ್ಣ ಪಿಂಞ ಚೇಂದಂಡ ಗೀತ ಶಿವಕುಮಾರ್ ಬೆಂದು ಪರಿಚಯ ಮಾಡ್‌ಚಿ. ಕಾರ್ಯದರ್ಶಿ ಚೊಟ್ಟೆಕಾಳಪಂಡ ಎನ್.ಮಾದಯ್ಯ ವರದಿ ಓದ್‌ಚಿ. ಸಾಧಕ ಮಕ್ಕಳ ಸನ್ಮಾನ ಮಾಡ್‌ಚಿ. ಉಪಾಧ್ಯಕ್ಷ ಐತಿಚಂಡ ನಂಜಪ್ಪ ವಂದನಾರ್ಪಣೆ ಮಾಡ್‌ಚಿ. ಕಾರ್ಯಕ್ರಮ ನಿರೂಪಣೆನ ಮಚ್ಚಿಮಾಡ ಲಾಲ ಕುಟ್ಟಪ್ಪ ಪಿಂಞ ನಾಗಂಡ ಕವಿತ ಸುಬ್ಬಯ್ಯ ನಡ್‌ಚಿ. ಸಾಂಸ್ಕೃತಿಕ ಕಾರ್ಯಕ್ರಮ ನಡಂದತ್. (ವರದಿ: ಬಿಜ್ಜಂಡ ವಿಜಯ್ ಮಾಚಯ್ಯ)

**ಬೆಂಗಳೂರ್ಲ್ 'ಪೇರೂರ್ ಕೊಡವ ಕೂಟ'**

ಬೆಂಗಳೂರ್ಲ್ ಉಳ್ಳ 'ಪೇರೂರ್ ಕೊಡವ ಕೂಟ' ಪಿಂಞ 'ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ'ರ ಕೂಟಾದನೆಲ್, ಕೊಡವ ಸಮಾಜತ್ 'ರೂಫ್ ಗಾರ್ಡನ್'ಲ್ ತಾ.13.12.2015ಂದ್ ಪೊಲಾಕ 'ಪುತ್ತರಿ ಒತ್ತೋಮೆ ಕೂಟ' ನಡಂದತ್. ಅಕಾಡೆಮಿ ಅಧ್ಯಕ್ಷ ಬಿದ್ವಾಟಂಡ ಎಸ್. ತಮ್ಮಯ್ಯಂಡ ಕೊರವಕಾರಿಕೆಲ್, 'ಹ್ಯಾಟ್ರಿಕ್ ಸ್ಟೋರ್ಟ್ಸ್' ಮ್ಯಾನೇಜರ್ ಕಲ್ಯಾಟಂಡ ಜಪ್ಪು ಈರಪ್ಪ ಕಾರ್ಯಕ್ರಮ ಉದ್ಘಾಟನೆ ಮಾಡ್‌ಚಿ.

\*\*\*\*\*

**ಶಿರಂಗಳ್ಳಿಕಾರಡ ಒತ್ತೋಮೆ+ಮಾಸಭೆ**

ಬೆಂಗಳೂರ್ಲ್ ಉಳ್ಳ ಶಿರಂಗಳ್ಳಿಕಾರಡ ಒಕ್ಕೂಟತ್ 8ನೇ ಕಾಲತ್ ಒತ್ತೋಮೆ ಕೂಟ ತಾ. 6.12.2015ಂದ್, ಕೊಡವ ಸಮಾಜತ್ ಕಾವೇರಿ ಹಾಲ್ಲ್, ಸರ್ಕಂಡ ಕೆ. ಸೋಮಯ್ಯಂಡ ಮುಂದಾಳ್ತನತ್ ನಡಂದತ್. ಪೊಲಾಕ ಕಳಿಕೂಟ ಏರ್ಪಡ್‌ಚಿ. ಇದೇ ಸಂದರ್ಭತ್, ಸುರೂಲ್ ಒಕ್ಕೂಟತ್ ಮಾಸಭೆಯೂ ನಡಂದತ್. ಉಡುವೇರ ದೀನ ವಸಂತ್ ದೇವಳ ತುದ್‌ಚಿ ಪಾಡ್‌ಚಿ. ಕಾರ್ಯದರ್ಶಿ ಉಡುವೆರ ಸಿ. ಸುರೇಶ್ ಸ್ವಾಗತ ಬಯಂದಿತ್, ವರದಿ ಒಪ್ಪುಚಿಟ್ಟತ್. ಖಜಾಂಜಿ ಉಡುವೆರ ಪಟ್ಟು ದಯಾನಂದ ಲೆಕ್ಕಪತ್ರ ಒಪ್ಪುಚಿಟ್ಟತ್. ಸಮಾರಂಭಕ್ ಉಡುವೆರ ಮಿಟ್ಟು ತಮ್ಮಯ್ಯ ಪಿಂಞ ಮಂಡೀರ ಸಿ. ಬೋಪಯ್ಯ ಬೆಂದುವಳಾಯಿತ್ ಬಂದಿತಿಂಜತ್. ಸಾಧಕಂಗಕ್, ಸಾಧಕ ಮಕ್ಕಕ್ ಸನ್ಮಾನ ಮಾಡ್‌ಚಿ. ಆಖೀರಿಲ್ ಮಂದೆಯಂಡ ರವಿ ಬಿದ್ವಪ್ಪ ವಂದನಾರ್ಪಣೆ ಮಾಡ್‌ಚಿ. ಮೋರ್ಕಂಡ ಸಿ. ಸುರೇಶ್ ಪಿಂಞ ಉಡುವೆರ ಎ. ಈರಪ್ಪ ಕಾರ್ಯಕ್ರಮ ನಿರೂಪಣೆ ಮಾಡ್‌ಚಿ.

\*\*\*\*\*

**ಬೆಂಗಳೂರ್ಲ್ 'ಬೇಂಗ್‌ನಾಡ್ ಒತ್ತೋಮೆ'**

ಬೆಂಗಳೂರ್ಲ್ ಉಳ್ಳ 'ಬೇಂಗ್‌ನಾಡ್'ಕ್ ಅಡಂಗ್‌ನ ಕೊಡವಡ 'ಒತ್ತೋಮೆ ಕೂಟ' ಕೊಡವ ಸಮಾಜತ್ 'ಫಿ.ಮಾ. ಕಾರ್ಯಪ್ಪ ಭವನ'ತ್ ತಾ.13.12.2015ಂದ್ ಪೊಲಾಕ ತೇಲಪಂಡ ರಘು ರಾಮಯ್ಯಂಡ ಮುಂದಾಳ್ತನತ್ ನಡಂದತ್.

\*\*\*\*\*

**ರಾಜಾಜಿನಗರ ಸಂಘ - 'ಬೊಳ್ಳಿ ನಮ್ಮೆ'**

ಬೆಂಗಳೂರ್ಲ್ ರಾಜಾಜಿನಗರ 'ಭಗವತಿ ಕೊಡವ ಸಂಘ'ಕ್ 25 ಕಾಲ ದುಂಬನಾಂಡ ಮಾರೀಪತ್ 'ಬೊಳ್ಳಿ ನಮ್ಮೆ' ತಾ.13.12.2015ಂದ್, ಸಮಾಜತ್ ಹರದಾಸ ಅಪ್ಪನೇರವಂಡ ಅಪ್ಪಚ್ಚಕವಿ ಸಭಾಂಗಣತ್, ಕೇಕಡ ಎ. ದೇವಯ್ಯಂಡ ಮುಂದಾಳ್ತನತ್ ನಡಂದತ್. ಸ್ಮರಣ ಸಂಚಿಕೆ ಬುಡ್‌ಗಡೆ ಮಾಡ್‌ಚಿ, ಸನ್ಮಾನ, ಸಾಂಸ್ಕೃತಿಕ ಕಾರ್ಯಕ್ರಮ ಇಂಜತ್.

ಕೊಡವ ಒಂದಾಂಡು: ಜನಾಂಗ ಉಳಿಯಂಡು

**ಬೆಂಗಳೂರ್‌ಲ್ 'ಹನುಮಂತನಗರ ಒತ್ತೋರ್ಮೆ'**

ಬೆಂಗಳೂರ್‌ಲ್ ಹನುಮಂತನಗರ, 'ಇಗ್ಗುತಪ್ಪ ಕೊಡವ ಸಂಘ'ತರ್ ಕಾಲತರ್ ಒತ್ತೋರ್ಮೆ ಕೂಟ ತಾ. 20.12.2015ಂದ್, ಕೊಡವ ಸಮಾಜತರ್ 'ಹರದಾಸ ಅಪ್ಪಚ್ಚಕವಿ ಸಭಾಂಗಣ'ತ್ ಮಚ್ಚೀಟಿರ ಸಾಬು ಭೀಮಯ್ಯಂಡ ಮುಂದಾಳ್ತನತ್ ನಡಂದತ್.

\*\*\*\*\*

**ಬೆಂಗಳೂರ್‌ಲ್ ಕರಾಟೆ ಚಾಂಪಿಯನ್ ಶಿಪ್**

ಬೆಂಗಳೂರ್‌ಲ್, ತಾ.20.12.2015ಂದ್, ಸಂಜಯನಗರ ಡ್ಯಾಪೋಡಿಲ್ ಇಂಗ್ಲಿಷ್ ಸ್ಕೂಲ್‌ಲ್. ಕುಪ್ಪಣಮಾಡ ಪಿ. ವಸಂತ್ ತಾಂಡ ಅಪ್ಪವ್ವಂಡ ಪೆದತ್ 'ಕುಪ್ಪಣಮಾಡ ಮುತ್ತಮ್ಮ ಪೂವಯ್ಯ ಮೆಮೋರಿಯಲ್', ಇಂಟರ್ ದೋಚೋ ಕರಾಟೆ ಚಾಂಪಿಯನ್ ಶಿಪ್ ನಡತ್‌ಚಿ.

\*\*\*\*\*

**ವಿವೇಕನಗರ ಕೊಡವ ಸಂಘ: ಆಡಳಿತ ಮಂಡಳಿ**

ಬೆಂಗಳೂರ್‌ಲ್ ವಿವೇಕನಗರ 'ಕೊಡವ ಸಂಘ'ತರ್ ಪುದಿಯ ಆಡಳಿತ ಮಂಡಳಿಕಾರ: ಅಧ್ಯಕ್ಷ: ಬೋಡಂಡ ಯು. ಮೇದಪ್ಪ; ಉಪಾಧ್ಯಕ್ಷಿಣಿ: ಬಲ್ಲಚಂಡ ಸುಶೀಲ ಮಾಚಯ್ಯ; ಗೌರವ ಕಾರ್ಯದರ್ಶಿ: ಐಚೆಟ್ಟಿರ ರತನ್ ಸೋಮಯ್ಯ; ಸಹಕಾರ್ಯದರ್ಶಿ: ಕಾಕಮಾಡ ಅನಿತಾ ವಸಂತ್; ಖಜಾಂಚಿ: ಮುಕ್ಕಾಟಿರ ಎಸ್. ಸುಬ್ಬಯ್ಯ.

\*\*\*\*\*

**ಕೊಡವ ಸ್ನೇಹಕೂಟ: ಆಡಳಿತಮಂಡಳಿ**

ಬೆಂಗಳೂರ್‌ಲ್ ತಿಪ್ಪಸಂದ್ರ 'ಕೊಡವ ಸ್ನೇಹ ಕೂಟ'ತರ್ ಪುದಿಯ ಆಡಳಿತ ಮಂಡಳಿಕಾರ: ಅಧ್ಯಕ್ಷ:ಕಲ್‌ಮಾಡಂಡ ಟಾಟಿ ಚೀಯಣ್ಣ; ಉಪಾಧ್ಯಕ್ಷಿಣಿ: ಅಲ್ಲಾರಂಡ ಬೊಳ್ಳು ಮಂದಣ್ಣ; ಗೌರವ ಕಾರ್ಯದರ್ಶಿ: ತೇಲಪಂಡ ಕಾಶಿ ಕಾಳಪ್ಪ; ಸಹಕಾರ್ಯದರ್ಶಿ: ತಂಬುಕುತ್ತಿರ ಕೆ. ಮಾಚಯ್ಯ; ಖಜಾಂಚಿ: ಪೆಬ್ಬಟ್ಟಿರ ಪ್ರೀತ್ ಬೋಪಣ್ಣ; ಕ್ರೀಡಾ ಕಾರ್ಯದರ್ಶಿ: ಬೊಳ್ಳುಂಡ ರೋಶನ್, ಸಂಘಟನಾ ಕಾರ್ಯದರ್ಶಿ:ಚೆಯ್ಯಂಡ ಕಟ್ಟಿ ಮುತ್ತಪ್ಪ; ಸಾಂಸ್ಕೃತಿಕ ಕಾರ್ಯದರ್ಶಿ: ಬಯವಂಡ ಸವಿತಾ ಬೆಳ್ಳಪ್ಪ

\*\*\*\*\*

**ಕೆಂಗೇರಿ ಸಂಘಕ್ ಪುದಿಯ ಜಾಗ..**

ಬೆಂಗಳೂರ್‌ಲ್ ಕೆಂಗೇರಿ 'ಫಿ.ವಾ. ಕಾರ್ಯಪ್ಪ ಕೊಡವ ಒಕ್ಕೂಟ'ಕಾರ, ಒಕ್ಕೂಟತರ್ ಕಟ್ಟಡ ಕಟ್ಟುವಕ್ ಮಾಗಡಿ ರಸ್ತೆಲ್, ಬಿಡಿವಿಕಾರ ಮಾಡ್ಯಂಡುಳ್ಳ ಪುದಿಯ ಕೆಂಪೇಗೌಡ ಬಡಾವಣೆರ ಪಕ್ಕತ್ 11 ಗುಂಟೆ (ಸುಮಾರ್ 12ಆಯಿರ ಚದರಡಿ/ಕಾಲ್ ಏಕರೆ) ಜಾಗತಾನ ಕ್ರಯಕ್ ಎಡ್ಡಂಡಿತ್. ಇದಲ್ಲತೆ ಒಕ್ಕೂಟಕ್, ಒಕ್ಕೂಟತರ್ ಸ್ಥಾಪಕ ಅಧ್ಯಕ್ಷಿಣಿ ಬಿದ್ದಂಡ ಸೀತಾ ಚಿಟ್ಟಿಯಪ್ಪ ಸಹ ಕೆಂಗೇರಿಲ್ 30x40ಅಡಿ ಅಳತೆರ ಸೈಟ್ ಒಂದಾನ ದಾನ ಕೊಡ್ತಿತ್.

ಕೊಡವ ಸಂಸ್ಕೃತಿ: ಕೊಡವಾಮೆರ ಭೀರ್ಯ

**ಗೋಣಿಕೊಪ್ಪತಾಂಬ 'ಕಾವೇರಿ ಟೈಮ್ಸ್' ದಿನಪತ್ರಿಕೆ**

ಡಾ. ಬಲ್ಲಡಿಚಂಡ ಸಿ. ನಂಜಪ್ಪಂಡ ಸಂಪಾದಕತ್ವತ್, ಗೋಣಿಕೊಪ್ಪತಾಂಬ 'ಕಾವೇರಿ ಟೈಮ್ಸ್' ಪುದಿಯ ಕನ್ನಡ ದಿನಪತ್ರಿಕೆ ತಾ.15.12.2015ಲಿಂಜಿ ಪ್ರಕಟಾಯಂಡ್ ಉಂಡ್. ಕಚೇರಿ: ಕಾವೇರಿ ಟೈಮ್ಸ್, ಟಾಸ್ ಬಿಲ್ಡಿಂಗ್, ಉಮಾಮಹೇಶ್ವರಿ ದೇವಸ್ಥಾನಪಕ್ಕ, ಗೋಣಿಕೊಪ್ಪ. 571213. ಕೊಡಗ್. ಫೋನ್: 08274 247888/298080

\*\*\*\*\*

**ಮಡಿಕೇರಿಲ್ ಅಕಾಡೆಮಿರ ಕೊಡವ ಕೇರಿ ಮೇಳ**

ಕರ್ನಾಟಕ 'ಕೊಡವ ಸಾಹಿತ್ಯ ಅಕಾಡೆಮಿ' ಪಿಂಇ 'ಮಡಿಕೇರಿ ಕೊಡವ ಸಮಾಜ'ತರ್ ಕೂಟಾದನೆಲ್ ಇದೇ ಡಿಸೆಂಬರ್ 20ಂಗ್, ಮಡಿಕೇರಿ ಗಾಂಧಿ ಮಂಟಪ ಪರಂಬುಲ್ ಮಡಿಕೇರಿ ಪಟ್ಟಣ ಮಟ್ಟತ್ 'ಕೊಡವ ಕೇರಿ ಮೇಳ' ನಡಂದತ್.

\*\*\*\*\*

**ಮೈಸೂರ್‌ಲ್ ಅಕಾಡೆಮಿರ ಸಾಂಸ್ಕೃತಿಕ ಮೇಳ**

ಕರ್ನಾಟಕ 'ಕೊಡವ ಸಾಹಿತ್ಯ ಅಕಾಡೆಮಿ' ಪಿಂಇ 'ಮೈಸೂರ್ ಕೊಡವ ಸಮಾಜ'ತರ್ ಕೂಟಾದನೆಲ್ 2016 ಜನವರಿ 9-10ಂಗ್ ಮೈಸೂರ್‌ಲ್ ರಾಜ್ಯಮಟ್ಟತರ್ 'ಕೊಡವ ಸಾಂಸ್ಕೃತಿಕ ಮೇಳ' ನಡಪದುಂಡ್.

\*\*\*\*\*

**2016: ಶಾಂತೆಯಂಡ ಕಘ್ ಹಾಕಿ ನಮ್ಮೆ**



ಕೊಡವ ಹಾಕಿ ಅಕಾಡೆಮಿರ ಆದನೆಲ್, 2016ನೇ ಇಸವಿಲ್, 20ನೇ ಕಾಲತರ್ ಕೊಡವ ಒಕ್ಕಡೊಕ್ಕಡ ಹಾಕಿ ನಮ್ಮೆನ ಶಾಂತೆಯಂಡ ಒಕ್ಕಕಾರ ನಡ್ತುವದುಂಡ್. ಇದಂಗಾಯಿತ್ ವೆಬ್‌ಸೈಟ್, ಲೋಗೋ, ಬ್ರೋಷರ್.. ಇನ್ನತಾನ ಬುಡ್‌ಗಡೆ ಮಾಡಿತ್. ಹಾಕಿ ನಮ್ಮೆ ಸಮಿತಿರ ಅಧ್ಯಕ್ಷ:ಶಾಂತೆಯಂಡ ರವಿ ಕುಶಾಲಪ್ಪ; ಕಾರ್ಯಾಧ್ಯಕ್ಷಿಣಿ: ಶಾಂತೆಯಂಡ ವೀಣಾ ಅಚ್ಚಯ್ಯ.

\*\*\*\*\*

**ಮೂರ್ನಾಡ್-ಪೊದ್ದಲ್ ಕ್ರಿಕೆಟ್ ಸ್ಟೇಡಿಯಂ**

ಮಡಿಕೇರಿ ತಾಲೂಕ್, ಮೂರ್ನಾಡ್ ಪಕ್ಕತ ಪೊದ್ದ್ ಗ್ರಾಮ ಪಂಚಾಯತಿ ಪ್ರದೇಶತ್, ಪೊದ್ದ್-ಬಲಂಬೇರಿ ರಸ್ತೆಲ್ ಸುಮಾರ್ 12.5 ಏಕರೆ ಜಾಗತಾನ ಕ್ರಿಕೆಟ್ ಸ್ಟೇಡಿಯಂ ಮಾಡುವಕಾಯಿತ್ ರಾಜ್ಯ ಕ್ರಿಕೆಟ್ ಸಂಸ್ಥೆರ ಮೂಲಕ ಎಡ್ಡವಾಂಡ್ ಗೊತ್ತಾಯಿತ್.

\*\*\*\*\*

ಪೂವ್‌ಕ್ ಗಮನ ಉಳ್ಳನ್ನಕೆ, ಮನ್‌ಷ್ಯಂಗ್ ವ್ಯಕ್ತಿತ್ವ.

## ಕೊಡಗಂಜ ಎಂ.ಎಲ್.ಸಿ ಆನ ಮಂಡೇಪಂಡ ಸುನಿಲ್ ಸುಬ್ರಮಣಿ



ಮಡಿಕೇರಿ ನಿವಾಸಿ, ಮಂಡೇಪಂಡ ಪಿ. ಸುನಿಲ್ ಸುಬ್ರಮಣಿ ಕಯಿಂಜ ಡಿಸೆಂಬರ್ ನಡಂದ ವಿಧಾನ ಪರಿಷತ್ (ಎಂಎಲ್‌ಸಿ) ಚುನಾವಣೆಲ್ ಕೊಡಗ್ ಸ್ಥಾನಕ್ ಗೆದ್ದಿತ್ 'ಶಾಸಕ'ನಾಯಿತುಂಡ್. ಇಯಂಡ ಅಣ್ಣ ಮಂಡೇಪಂಡ ಪಿ.ರಂಜನ್ ಅಪ್ಪಚ್ಚು ಈಂಗ್ ಮುಪ್ಪಡೆ ಮಡಿಕೇರಿ ತಾಲೂಕ್

ವಿಧಾನ ಸಭೆ (ಎಂಎಲ್‌ಎ) ಶಾಸಕ ಸ್ಥಾನತ್ ಉಳ್ಳದ್ ಬಲ್ಯೋರ್ ದಾಖಲೆ ಆಯಿತುಂಡ್. ಇವು ಚೆಂಬೆಬಳ್ಳೂರ್ ಮಂಡೇಪಂಡ ಪೂವಯ್ಯಂಡ ಮಕ್ಕ. ರಂಜನ್ ಅಪ್ಪಚ್ಚು ಮಾದಾಪುರ ಕುಂಬೂರ್ ಉಂಡ್.

\*\*\*\*\*

## ನಾಡಲ್ ಪುತ್ತರಿ ನಮ್ಮೆರ ಊರೋರ್ಮೆ..

ಮರೆನಾಡ್ ಕೊಡವ ಸಮಾಜ ಪಿಂಞ ಕೊಡವ ಸಾಹಿತ್ಯ ಅಕಾಡೆಮಿರ ಕೂಟಾದನೆಲ್ ತಾ. 30.11.2015ಂಡ್ ಪೊಲಾಕ ಬಿರುನಾಣಿ 'ಮರೆನಾಡ್ ಕೋಲ್ ಮಂದ್'ಲ್ 'ಪುತ್ತರಿ ನಾಡ್ ಮಂದ್ ಸಾಂಸ್ಕೃತಿಕ ನಮ್ಮೆ' ನಡಂದತ್.

ಬಾಡಗರಕೇರಿ ಪೊರಾಡಲ್ 59ನೇ ಕಾಲತ್ ಪುತ್ತರಿ ಊರೋರ್ಮೆ ತಾ.1.12.2015ಂಡ್ ಪೊಲಾಕ 'ಕೊಟ್ಟ್ ಬಾಣೆ'ಲ್ ನಡಂದತ್.

ಕುಟ್ಟ ಕೊಡವ ಸಮಾಜ ಪಿಂಞ ಕೊಡವ ಸಾಹಿತ್ಯ ಅಕಾಡೆಮಿರ ಕೂಟಾದನೆಲ್ ತಾ. 4.12.2015ಂಡ್ ಪೊಲಾಕ ಕುಟ್ಟ ಕೊಡವ ಸಮಾಜ ಕಟ್ಟಡತ್ 'ಪುತ್ತರಿ ಸಾಂಸ್ಕೃತಿಕ ನಮ್ಮೆ' ನಡಂದತ್.

ಪೂನಾ ಕೊಡವ ಸಂಘತ್ ಆದನೆಲ್ ತಾ.4.12.2015ಂಡ್, ಕವಾಂಡ್ ಆಸ್ಪತ್ತೆರ 'ಆಫಿಸರ್ಸ್ ಮೆಸ್'ಲ್ ಕರ್ನಲ್ ಅಪ್ಪಂಡೇರಂಡ ಎನ್ ಮಹೇಶ್ ಚಂಗಪ್ಪಂಡ ಮುಂದಾಳ್ತನತ್ ಕಾಲತ್ ಪುತ್ತರಿ ಊರೋರ್ಮೆ ನಡಂದತ್.

ಮಂಗಳೂರ್ ಕೊಡವ ಸಮಾಜತ್ ತಾ. 5.12.2015ಂಡ್ ಬೈಟಾಪಕ, ಮಂಗಳೂರ್ ಬೈಂದೂರ್ 'ಸೈಂಟ್ ಸಬಾಸ್ತಿಯನ್ ಮಿನಿ ಹಾಲ್'ಲ್, ಮುದ್ದಿಯಡ ಕೆ. ಸೋಮಯ್ಯಂಡ ಮುಂದಾಳ್ತನತ್ 'ಪುತ್ತರಿ ಊರೋರ್ಮೆ' ನಡಂದತ್.

ಅಮ್ಮತ್ತಿ ಕೊಡವ ಸಮಾಜತ್ ತಾ. 6.12.2015ಂಡ್ ಬೈಟಾಪಕ ಮೂಕೋಂಡ ಬೋಸ್ ದೇವಯ್ಯಂಡ ಮುಂದಾಳ್ತನತ್ ಪುತ್ತರಿ ಊರೋರ್ಮೆ ನಡಂದತ್.

ಮಡಿಕೇರಿ ಕೊಡವ ಸಮಾಜತ್ ತಾ. 13.12.2015ಂಡ್ ಪೊಲಾಕ ಮೂವೇರ ಶಂಭು ಸುಬ್ಬಯ್ಯಂಡ ಮುಂದಾಳ್ತನತ್ ಪುತ್ತರಿ ಊರೋರ್ಮೆ ನಡಂದತ್.

\*\*\*\*\*

## ಪೊನ್ನಂಪೇಟೆ ಸಮಾಜತ್ ಸಾಂಸ್ಕೃತಿಕ ದಿನ

ಪೊನ್ನಂಪೇಟೆ ಕೊಡವ ಸಮಾಜತ್ ತಾ.25.12.2015ಂಡ್ 'ಕೊಡವ ಸಾಂಸ್ಕೃತಿಕ ದಿನ ಪಿಂಞ ಪುತ್ತರಿ ಕೋಲ್' ಸುಳ್ಳಿಮಾಡ ಗೋಪಾಲ್ ತಿಮ್ಮಯ್ಯಂಡ ಮುಂದಾಳ್ತನತ್ ನಡಂದತ್. ಅಂದ್ ಪೊಲಾಕ ಕೋಲಾಟ್, ಬೊಳಕಾಟ್, ಪರೆಯಕಳಿ, ಉಮ್ಮತಾಟ್, ಕೇರ್ ಬಲಿ.. ಇನ್ನತ ಪೈಪೋಟಿ ಏರ್ಪಡ್ತಚಿ. ಉಂಡಿತಾನದು ಸಭೆರ ಕಾರ್ಯಕ್ರಮ ಇಂಜತ್. ಅದಾನದು 'ಪುತ್ತರಿ ಕೋಲ್' ಪೊಜ್ಜತ್.

\*\*\*\*\*

## ಶಾಂತಿ ಅಪ್ಪಣ್ಣಿಂಗ್ ಚಂದಾ ಪ್ರಶಸ್ತಿ



ಚೆನ್ನೈಲ್ ಉಳ್ಳ ಎಳ್ತಕರ್ತಿ, ಶಾಂತಿ ಅಪ್ಪಣ್ಣಿ(ತಾಮನೆ:ಕಾಯಪಂಡ) ಎಳ್ತದನ ಕಥೆ ಪುಸ್ತಕಕ್ ಬೆಂಗಳೂರ್ 'ಚಂದಾ ಪುಸ್ತಕ ಪ್ರಕಾಶನ' ಸಂಸ್ಥೆ 20ಆಯಿರ ಉರ್‌ಪಿಯ ಇನಾಂ ಕೊಡಪದುಂಡ್. ಈ ಪುಸ್ತಕ ತಾ. 14.2.2015ಂಡ್ ಬೆಂಗಳೂರ್ ಬುಡ್‌ಗಡೆ ಆಪದುಂಡ್. ಶಾಂತಿ ಅಪ್ಪಣ್ಣಿಂಗ್, 'ಪ್ರಜಾವಾಣಿ' ಪತ್ರಿಕೆರ 2015 ದೀಪಾವಳಿ ವಿಶೇಷಾಂಕ ಕಥೆ ಪೈಪೋಟಿಲ್ ಒಂದನೇ ಇನಾಮು ಬಂದಿತ್. ಚೆನ್ನೈ ರೈಲ್ವೆಸ್‌ಲ್ ಚಾಕ್ರಿಲುಳ್ಳ ಶಾಂತಿರ ಕಥೆ ಕವನ ಕನ್ನಡ ಪತ್ರಿಕೆಲ್ ಪ್ರಕಟಾಯಂಡುಂಡ್.

## ಚಂದನತ್ 'ನಂಗ ಕೊಡವ' ಧಾರಾವಾಹಿ

ಕೊಡವ ಧಾರಾವಾಹಿ 'ನಂಗ ಕೊಡವ' ಇದೇ ಜನವರಿ 10ಲಿಂಜಿ ನಾರಾಚಿ ಬೈಟ್ 8ಲಿಂಜಿ 8.30ಕೆತ್ತಣೆ ದೂರದರ್ಶನ 'ಚಂದನ' ಕನ್ನಡ ವಾಹಿನಿಲ್ ಪ್ರಸಾರ ಆಯಂದುಂಡ್. ಧಾರಾವಾಹಿ ನಿರ್ದೇಶನ ಪಿಂಞ ನಿರ್ಮಾಪಕಂಗ ಆಪಾಡಂಡ ಟಿ. ರಘು. ಕಲಾವಿದಂಗ: ನೆರವಂಡ ಎಂ. ಉಮೇಶ್, ಬಲ್ಲಚಂಡ ಭಜನ್ ಬೋಪಣ್ಣ, ಕೊಟ್ಟ ಕತ್ತಿರ ಪ್ರಕಾಶ್, ಕಾಳಿಮಾಡ ದಿನೇಶ್ ನಾಚಪ್ಪ, ತೇಲಪಂಡ ಪವನ್ ತಮ್ಮಯ್ಯ, ಪೊನ್ನಚಿಟ್ಟಿರ ರಮೇಶ್ ಗಣಪತಿ, ಪುಟ್ಟಿಚಂಡ ಶಂಕರ್, ಡಾ. ಮೇಚಿರ ಸುಭಾಷ್ ನಾಣಯ್ಯ, ಬೊಪ್ಪಂಡ ಬೊಳ್ಳಮ್ಮ ನಾಣಯ್ಯ, ಅಪ್ಪಂಡೇರಂಡ ತೇಜ ಪೊನ್ನಪ್ಪ, ಪಾಡೆಯಂಡ ಪಲ್ಲವಿ ನಾಣಯ್ಯ, ಕೇಲೇಟಿರ ಪ್ರೇಮಾ, ನೆಲ್ಲಚಂಡ ರೇಖಾ, ನೆಲ್ಲಚಂಡ ರಿಶೀ ಪೂವಮ್ಮ, ತೇಲಪಂಡ ಶಶಿ ಪೆಮ್ಮಯ್ಯ, ನಂದಿನೆರವಂಡ ಆಕಾಶ್, ಮೇಕೇರಿರ ಪೊನ್ನಪ್ಪ, ವಿನ್ನಿ ಪೊನ್ನಪ್ಪ, ಅಪ್ಪೇಂಗಡ ದೀಕ್ಷಾ ಗಣಪತಿ.. ಇನ್ನತವು.

\*\*\*\*\*

## ಬಾಳಗೋಡಲ್ ಬಲ್ಯ ಮಂಗಲ ಹಾಲ್

ವೀರಾಜಪೇಟೆ ಪಕ್ಕತ ಬಾಳಗೋಡಲ್ ಕೊಡವ ಸಮಾಜ ಒಕ್ಕೂಟತ್ 'ಮಂಗಲ ಹಾಲ್' ತೊರಂದಿತ್. ಕಯಿಂಜ ಡಿಸೆಂಬರ್ 20ಂಡ್, ಆದ್ಯದಾಯಿತ್ ಒಕ್ಕೂಟತ್ ಅಧ್ಯಕ್ಷ ಮಲ್ಲೇಂಗಡ ಎನ್. ದಾದಾ ಬೆಳ್ಳಪ್ಪ ಅಯಿಂಗ, ತಾಂಡ ದಂಡನೇ ಮೋಂವಂಡ ಮಂಗಲತ್ ಇಲ್ಲಿ ಕಯಿಚತ್. ಮಿಂಞಾಕ್ ಕೆಲವು ಮಂಗಲವೂ ಬುಕ್ ಆನದ್ ಗೊತ್ತಾಯಿತ್.

## ಬೆಂಗಳೂರ್ ಸಮಾಜತ್ ಅಂತರ ಸಂಘ ಸಾಂಸ್ಕೃತಿಕ ಪೈಪೋಟಿ

ಬೆಂಗಳೂರ್ ಕೊಡವ ಸಮಾಜತ್ ಅಂತರ ಸಂಘ ಕೊಡವ ಸಾಂಸ್ಕೃತಿಕ ಪೈಪೋಟಿ ತಾ. 15.1.2016ಂದ್, ಸಮಾಜ ಅಧ್ಯಕ್ಷ ಮಂಡೇಡ ಎ.ರವಿ ಉತ್ತಪ್ಪಂಡ ಮುಂದಾಳ್ತನತ್ ನಡಂದತ್. ಸಮಾಜತ್ ಉಪಾಧ್ಯಕ್ಷಿಣಿ ಮುಕ್ಕಾಟಿರ ವಾಣಿ ನಾಣಯ್ಯ ಕಾರ್ಯದರ್ಶಿ ಚೆನ್ನಪಂಡ ಕೆ.ಸುಬ್ಬಯ್ಯ ಸಹಕಾರ್ಯದರ್ಶಿ ಮಾಚೆಟಿರ ಎಂ. ಡಾಲು, ಖಜಾಂಜಿ ಬೂವಡಿರ ಎಂ. ಗಣಪತಿ ಸಹಖಜಾಂಜಿ ಚೇರಂಡ ಎಂ. ಸುರೇಶ್, ಸಾಂಸ್ಕೃತಿಕ ಸಮಿತಿ ಅಧ್ಯಕ್ಷ ಪೊನ್ನಚೆಟ್ಟಿರ ರಮೇಶ್ ಗಣಪತಿ ಕೂಡಿಯಾಡ್ಚಿ.



ಬೆಂಗಳೂರ್ ಸಮಾಜತ್ ಅಂತರ ಸಂಘ ಸಾಂಸ್ಕೃತಿಕ ಪೈಪೋಟಿ



ಯು.ಎ.ಇ.ಲ್ ಉಳ್ಳ ಕೊಡವ ಇದೇ ತಾ.12.11.2015ಂಗೆ ಕೊಡವ ಒತ್ತೊಮ್ಮೆ ಕೂಟತನ ಕೊಡವಾಮೆಕೊತ್ತ ಚಾಯಿ-ಬೋಜತ್ ನಡತ್‌ಚಿ.

ಆಯಿಮೆನ "ಮಂಗಲಮನೆ"ರ ಪರಿಕಲ್ಪನೆಲ್ ಏರ್ಪಡ್‌ತಿಂಜತ್. ಎದಿಕೆ ಬಾಳೆಕಂಬ್ ಕುತ್ತಿತ್, ಬೋಳಪು ಬಟ್ಟೆ ಪೊದತ್. ಬಾಳೆ ಮರ್ಯಾದಿ, ಚಿಂಡ್‌ಪೂವ್‌ರ ಅಲಂಕಾರ, ಕಿಂಡಿ, ಕೊಡೆ, ಮುಕ್ಕಾಲಿ... ಪದ್ಧತಿರ ಮಂಗಲ ಮಂಟಪ... ಇನ್ನತಾನೆಲ್ಲ ಕಣ್ಣಕ್ ಕೊದಿಯಾಪನ್ನಕೆ ಏರ್ಪಾಡ್ ಮಾಡಿಂಜತ್.

ಕಿರ್ ಪರಿಚಯ

## ಫೀ. ಮಾ. ಕೊಡಂದೇರ ಎಂ. ಕಾರ್ಯಪ್ಪ

ಕೊಡಗ್ಗರ ಶನಿವಾರಸಂತೆಲ್ ಕೊಡಂದೇರ ಮೇದಪ್ಪ-ಕಾವೇರಿ ದಂಪತಿಯಡ ದಂಡನೇ ಮೋಂವನಾಯಿತ್, 1900 ಜನವರಿ 28ಂದ್ ಕಾರ್ಯಪ್ಪಜ್ಜ(ಗೌರವತ್ ಕಾರ್ಯಪ್ಪಜ್ಜಂದ್ ಕಾಕನ) ಪುಟ್ಚಿ. ವಿದ್ಯೆ, ಬುದ್ಧಿಲ್ ಹುಷಾರಿಂಜ ಕಾರ್ಯಪ್ಪಜ್ಜ ಶನಿವಾರಸಂತೆ, ಕುಶಾಲನಗರ ಪಿಂಞ ವೀರಾಜಪೇಟೆ ಪ್ರಾಥಮಿಕ ಸ್ಕೂಲ್ ವಿದ್ಯಾಭ್ಯಾಸ ಮಾಡಿತ್, ಮಡಿಕೇರಿ ಸೆಂಟ್ರಲ್ ಹೈಸ್ಕೂಲ್ ಓದ್ಚಿ. ಕಾರ್ಯಪ್ಪಜ್ಜ ಅಕ್ಕಲೇ ಹಾಕಿ, ಕ್ರಿಕೆಟ್, ಟೆನಿಸ್, ಪೋಲೋ ಇನ್ನತ ಕ್ರೀಡೆಲ್ ಹುಶಾರ್‌ಮಾರಿ ಆಯಿಂಜತ್. 1917ಲ್ ಕಾರ್ಯಪ್ಪ ಮದ್ರಾಸ್ ಪ್ರೆಸಿಡೆನ್ಸಿ ಕಾಲೇಜ್‌ಲ್ ಇಂಟರ್ ಮೀಡಿಯೇಟ್ ಕೋರ್ಸ್‌ಕ್ ಕೂಡ್ಚಿ. ಭಾರತತ್ ಬ್ರಿಟಿಷ್ ಇಂಡಿಯಾ ಆರ್ಮಿಕ್ ಕೂಡಿತ್ ಒಂದರ ಕಾಲತ್‌ರ ಟ್ರೈನಿಂಗ್ ಮಾಡ್‌ನ ಕಾರ್ಯಪ್ಪ ವಾಪಾಸ್ ತಿರಿತ್ ನೋಟಿಟಿಲ್ಲೆ.

ಲೆಫ್ಟಿನೆಂಟ್ ಆಫೀಸರ್ ಆನ ಕಾರ್ಯಪ್ಪಜ್ಜ 1920ಲ್ ಅಧ್ಯದಾಯಿತ್ 2/88ನೇ ಕೂರ್ಗ್ ಕರ್ನಾಟಕ ಇನ್‌ಫೆಂಟ್ರಿಲ್ ಅಧಿಕಾರ ವಹಿಯಂಡತ್. ನೀಪಿಯರ್ಸ್ ರೈಫಲ್ಸ್ ಟೀಂರ ಕೂಡೆ ಇರಾಕ್‌ಕ್ ಪೋಚಿ. 1922ಲಿಂಜಿ 1925ಕೆತ್ತನೆ ದೋಗ್ರಾ ಪಿಂಞ ರಜಪೂತ್ ಬೆಟಾಲಿಯನ್‌ಲ್ ಸಾಧನೆ ಮಾಡ್‌ಚಿ. ಅಕ್ಕಣೆ ಕಾರ್ಯಪ್ಪ ಕೆನಡಾ, ಚೀನಾ, ಜಪಾನ್, ಅಮೇರಿಕಾ, ನ್ಯೂಜಿಲ್ಯಾಂಡ್ ಇನ್ನತ ಸುಮಾರ್ ದೇಶತ್‌ನ ಸುತ್ತಿತ್ ಬಂದಿಂಜತ್. 1928ಲಿಂಜಿ 1930ಕೆತ್ತಣೆ ವಾಜಿರಿಸ್ತಾನ್‌ಲ್ ಇಂಜಿತ್ ಸೇನಾ ನಾಯಕತ್ವತ್‌ರ ಕೈಚೆಳಕ ಅರ್‌ಂಜತ್.

1933ಲ್ ಕ್ಯಾಪ್ಟನ್ ಸ್ಥಾನಕ್ ಏರ್‌ಚಿ. 1937ಲ್ ಕಾರ್ಯಪ್ಪ ಮಂಗಲಾಚಿ. ದಂಪತಿಕ್ ಓರ್ ಮೂಡಿ ಪಿಂಞ ಓರ್ ಕಣ್ಣಿ. 1946ಲ್ ಇಯಂಡ ಸಂಸಾರ ಬದ್‌ಕ್ ದೂರಾಚಿ. 1939ಲ್ ಬಲೂಚಿಸ್ಥಾನತ್‌ರ ಕ್ಲೆಪ್ಪಾ ಸ್ಪಾಫ್ ಕಾಲೇಜ್‌ಲ್ ಮೇಜರ್ ಆಯಿತ್, ಪ್ರಪ್ರಥಮ ಭಾರತೀಯ ಅಧಿಕಾರಿಯಾಚಿ. 1939-44ಂಡ ದಂಡನೇ ವಾಪಡಲ್ ಪೋರಾಡ್‌ನ ಕಾರ್ಯಪ್ಪಜ್ಜ ಕೇಳಿಪಟ್ಟಿ ಸೇನಾಧಿಕಾರಿಯಾಚಿ. 1942ಲ್ ಕರ್ನಲ್ ಪದವಿಗೇರಿತ್ ಉತ್ತರ ಆಫ್ರಿಕಾತ್ ಇಂಜತ್. 1943 ಲ್ ಬರ್ಮಾಕ್ ಪೋಚಿ 1944ಲ್ ಬ್ರಿಗೇಡಿಯರ್ ಆಯಿತ್ ಬಡ್ತಿ ಪಡ್‌ಂದತ್.

ಕಾರ್ಯಪ್ಪಜ್ಜ ಸೇನರ ಸಾಧನೆರ ಕೂಡೆ ತಾಂಡ ದಂಡ್ ಮಕ್ಕಳ ಚಾಕ್‌ಚಿ. ಬ್ರಿಟಿಷ್ ಆಳ್ವಿಕೆಕ್ ಹೊಂದಿಯಂಡ್, ದೇಶಾಭಿಮಾನ ಬುಡತೆ ಛಲತ್ ಮಿಂಞಕ್ ನಡ್‌ಂದತ್. ದೇಶತ್ ದಕ್ಷ ಅಧಿಕಾರಿ ಪಿಂಞ ನಾಯಕನಾಚಿ. 1947ಲ್ ಕಾರ್ಯಪ್ಪ ಮೇಜರ್ ಜನರಲ್ ಪದವಿ ಏರುವಕ ಬ್ರಿಟಿಷ್ ಆಳ್ವಿಕೆರ ಒಳಗುಟ್ಟ್, ಗಡಿ ಸಮಸ್ಯೆ, ದೇಶತ್‌ರ ಸಮಸ್ಯೆ ಎಲ್ಲಾ ಗೊತ್ತಾಯಿಂಜತ್. 1947ಲ್ ಭಾರತ-ಪಾಕಿಸ್ತಾನ ವಿಭಜನೆ ಆಪಕ ಸೇನೆನ ಪಾಲ್‌ಡ್‌ವ ಜವಾಬ್ದಾರಿ ನಿಸ್‌ಚಿ.

ಸ್ವಾತಂತ್ರ್ಯ ಕಾಟ್‌ನದು ಪ್ರಜಾಪ್ರಭುತ್ವ ರೀತಿ-ನೀತಿನ ಕೂಟ್ಟಂಡತ್. 1949 ಜನವರಿ 15ಂದ್ ಭೂಸೇನರ ಮಹಾ ದಂಡನಾಯಕನಾಚಿ. 1953 ಜನವರಿ 14ಂದ್ ನಿವೃತ್ತರಾನದೂ ಅದೇ ಕಾಲ ಜುಲೈಂಜ,

1956 ಏಪ್ರಿಲ್‌ಕೆತ್ತಣೆ ಮೂಂದ್ ಕಾಲ ಆಸ್ಟ್ರೇಲಿಯಾ ಪಿಂಞ ನ್ಯೂಜಿಲ್ಯಾಂಡ್‌ರ ಹೈಕಮಿಷನರ್ ಆಯಿಂಜತ್. ಅಲ್ಲಿಂಜಿ ಮಡಿಕೇರಿರ 38 ಏಕ್ರೆ ಜಾಗತ್‌ರ 'ರೋಶಾನಾರ್'ತನ ಚಾಯಿ ಕೂಟ್‌ಚಿ. ಶಿಸ್ತರ ಸಿಪಾಯಿ ಕಾರ್ಯಪ್ಪಜ್ಜ ಶಿಸ್ತಕೇ ಕೇಳಿ ಪಟ್ಟತ್.

1986 ಏಪ್ರಿಲ್ 28ಂದ್ ಕಾರ್ಯಪ್ಪಜ್ಜಂಗ್ ಭಾರತ ಸರ್ಕಾರ 'ಫೀಲ್ಡ್ ಮಾರ್ಷಲ್' ಪದವಿ ಕೊಡಿತ್ ಗೌರವಿಚಿಟ್ಟತ್. ಇವು ತಾಂಡ 93ನೇ ಬಯತ್‌ಲ್, ಬೆಂಗಳೂರ್ ಮಿಲಿಟರಿ ಆಸ್ಪತ್ರೆಲ್ 1993 ಮೇ 15ಂದ್ ನಂಗಳ ಬುಟ್ತ್ ಪೋಚಿ. ಬ್ರಿಟಿಷ್ ಸರ್ಕಾರ ಇಯಂಗೆಕ್ ದಂಡನೇ ಮಾಪಡಲ್ ಕಾಟ್‌ನ ಶೌರ್ಯಕಾಯಿತ್ 'ಆಡರ್ ಆಫ್ ದಿ ಬ್ರಿಟಿಶ್ ಎಂಪೈರ್'(ಔಃಇ)' ಪ್ರಶಸ್ತಿ ಕೊಡ್ ಗೌರವಿಚಿಟ್ಟತ್. 1952ಲ್ ನೇಪಾಳ ಮಹಾರಾಜ ತ್ರಿಭೂವನ್ ಕಾರ್ಯಪ್ಪಜ್ಜಂಗ್ ನೇಪಾಳ ಸೇನರ ಗೌರವ ಪಿಂಞ ಆಗ್ರಾ, ಮೈಸೂರು ಅಲ್ಲತೆ ಮಂಗಳೂರು ವಿಶ್ವವಿದ್ಯಾಲಯ ಗೌರವ ಡಾಕ್ಟರೇಟ್ ಕೊಡಿತ್ತೂ ಗೌರವಿಚಿಟ್ಟತ್.

ಫೀ.ಮಾ.ಕಾರ್ಯಪ್ಪಜ್ಜಂಡ ಗೌರವಾರ್ಥ, ಬೆಂಗಳೂರ್ ರೆಸಿಡೆನ್ಸಿ ರಸ್ತೆಕ್ 'ಫೀಲ್ಡ್ ಮಾರ್ಷಲ್ ಕೆ. ಎಂ. ಕಾರ್ಯಪ್ಪ ರಸ್ತೆ'ಂದ್ ಪೆದ ಬೆಚ್ಚಿತ್. 1956ಲಿಂಜಿ ಮಡಿಕೇರಿಲಿಪ್ಪಕ ಕಾರ್ಯಪ್ಪಜ್ಜ ತಾಂಡ ಪಕ್ಕ ಇಂಜ ಸೇನಾ ವಸ್ತು-ವಸ್ತ್ರ, ಕೊಡುಗೆನ ಮಡಿಕೇರಿ ಕೋಟೆ ಆವರಣತ್ ಉಳ್ಳ ವಸ್ತು ಸಂಗ್ರಹಾಲಯಕ್ ದಾನ ಮಾಡಿತ್. 1958ಲ್ ಮೈಸೂರ್ ಮಹಾರಾಜ ಇಯಂಡ ಸಾಧನೆಕಾಯಿತ್ ಕೊಡ್ತ ಸುಮಾರ್ ಒರ್ ಏಕರೆ ಜಾಗತ್‌ನ ಕಾರ್ಯಪ್ಪಜ್ಜ, ಬೆಂಗಳೂರ್ ಕೊಡವ ಸಮಾಜಕ್ ಕೊಡ್ತತ್. ಇಕ್ಕ ಬೆಂಗಳೂರ್ ಕೊಡವ ಸಮಾಜ ಇಲ್ಲಿಯೇ ನೆಲೆ ನಿಂದಿತ್. ಸಮಾಜ ಹಾಲ್‌ಕ್ 'ಫಿ.ಮಾ.ಕೆ.ಎಂ ಕಾರ್ಯಪ್ಪ ಭವನ'ಂದ್ ಪೆದ ಬೆಚ್ಚಿತ್.

ಮೈಸೂರ್ ಕೊಡವ ಸಮಾಜತ್ ಮುಖ್ಯ ಸಭಾಂಗಣಕ್ 'ಫೀ. ಮಾ. ಕಾರ್ಯಪ್ಪ ಹಾಲ್'ಂದ್ ಪೆದ ಬೆಚ್ಚಿತ್. ಫೀ. ಮಾ.ಕೆ.ಎಂ. ಕಾರ್ಯಪ್ಪ ರಸ್ತೆ ವೀರಾಜಪೇಟೆಲ್ ಉಂಡ್. ಮೈಸೂರ್ ಮೆಟ್ರೋಪೋಲ್ ಸರ್ಕಲ್‌ಕ್ 'ಫಿ.ಮಾ. ಕಾರ್ಯಪ್ಪ ಸರ್ಕಲ್'ಂದ್ ಪೆದ ಬೆಚ್ಚಿತ್. ಮಡಿಕೇರಿ ಸರ್ಕಾರಿ ಕಾಲೇಜ್‌ಕ್ 'ಫೀ ಮಾ. ಕಾರ್ಯಪ್ಪ' ಪೆದ ಬೆಚ್ಚಿತ್. ಬೆಂಗಳೂರ್‌ಲ್ ಮಹಾತ್ಮ ಗಾಂಧಿ ರಸ್ತೆರ ಮಣೆಕಶಾ ಪರಂಬುರ ಪಕ್ಕತ ಸುಮಾರ್ 22 ಏಕ್ರೆ ಪ್ರದೇಶತ್ 'ಫೀಲ್ಡ್ ಮಾರ್ಷಲ್ ಕೆ. ಎಂ. ಕಾರ್ಯಪ್ಪ ಉದ್ಯಾನ' ಉಂಡ್. ಇಂಞಾಸಿಂರ ಬರಿಲ್, ಮಣಿಪಾಲ್ ಸೆಂಟರ್ ಪಕ್ಕ ಕಾರ್ಯಪ್ಪ ಬ್ಲಾಕ್ ಸೇನಾ ಕ್ವಾಟರ್ಸ್ ಉಂಡ್. ಇನ್ನನೆ ಕೊಡಗ್ಗರ, ಕರ್ನಾಟಕ ರಾಜ್ಯತ್‌ರ ಪಿಂಞ ದೇಶತ್‌ರ ಬೋರೆ ಬೋರೆ ಕಡೆ ಕಾರ್ಯಪ್ಪಂಡ ಪೆದತ್ ಸುಮಾರ್ ಗೌರವ ರಸ್ತೆ, ಕಟ್ಟಡ ಎಲ್ಲಾ ಉಂಡ್. ಸೇನೆಲೂ ಅಲ್ಲತೆ ಸರ್ಕಾರಿ ಇಲಾಖೆಲೂ ಫೀ.ಮಾ.ಕಾರ್ಯಪ್ಪ ಪೆದ ಉಂಡ್. ಕಾರ್ಯಪ್ಪಜ್ಜ 1965ಲ್ ಭಾರತ ಅಮೆಚೂರ್ ಅಡ್ಡೆಟಿಕ್ ಫೆಡರೇಶನ್ ಅಧ್ಯಕ್ಷನಾಚಿ. 1971ಲ್ ಉತ್ತರ ಮುಂಬೈಂಜಿ ಲೋಕಸಭೆಕ್ ಶಿವಸೇನಾ ಬೆಂಬಲತ್ ಸ್ಪರ್ಧೆ ಮಾಡಿತ್ ಚೋತದೂ ಉಂಡ್.

ಕಿರ್ ಪರಿಚಯ

## ಜನರಲ್ ಕೊಡಂದೇರ ಎಸ್. ತಿಮ್ಮಯ್ಯ

ಕೊಡಂದೇರ ತಿಮ್ಮಯ್ಯ-ಸೀತವ್ವ (ಚೀತವ್ವ) ದಂಪತಿಯಡ ಮೋಂವೊ ಜ. ತಿಮ್ಮಯ್ಯ (ಜನರಲ್ ಪದವಿ ಬಯ್ಯಂಜಿ ಕ್ಷೆಟ್ಟಿಯೆ-ಗೌರವತ್ ಬಳಕೆ) ಕೊಡಂದೇರ ತಿಮ್ಮಯ್ಯಂಡ ಮೋಂವೊ ಸುಬ್ಬಯ್ಯ ಎಣ್ಣೆತ್ ಸ್ಕೂಲ್ ಪೆದ ಕೊಡ್ತದ್ ಕೊಡಂದೇರ ಎಸ್. ತಿಮ್ಮಯ್ಯ ಆಯಿಪೋಚಿ. 1906 ಮಾರ್ಚ್ 31ಂದ್ ಮಡಿಕೇರಿರ ಸನ್ನಿ ಸೈಡ್ ಮನೆಲ್ ತಿಮ್ಮಯ್ಯ ಪುಟ್ಟಚಿ. ಇಯಂಡ ಪ್ರೀತಿರ ಪೆದ ತಿಮ್ಮಿ. 1912ಲ್, ಅಂದ್ ಊಟ-ಕೂನೂರ್ ಸೈಂಟ್ ಜೋಸೆಫ್ ಸ್ಕೂಲ್ ಪ್ರಾಥಮಿಕ ವಿದ್ಯಾಭ್ಯಾಸಕ್ಕಾಯಿತ್ ಕೂಟ್ಚಿ. ಸೋದರ ಪೊನ್ನಪ್ಪನೂ ಇಲ್ಲಿಯೇ ಓದ್ಚಿ. ಅಲ್ಲಿಂಜಿ 1918ಲ್ ಬೆಂಗಳೂರ್ ಬಿಷಪ್ ಕಾಟನ್ ಕ್ಷೆಟ್ಟಿಂಗಡ ಸ್ಕೂಲ್ ಹೈಸ್ಕೂಲ್ ಓದ್ಕ್ ಕೂಡ್ಚಿ. ಜ.ತಿಮ್ಮಯ್ಯ ಓದಲ್ ಅಚ್ಚಕೋರ್ ನಲ್ಲ ಸಾಧನೆ ಮಾಡಲೇಂಗಿಯೂ, ಕಳಿ, ಸಾಹಸ, ಧೈರ್ಯತ್ ನಲ್ಲ ಸಾಧನೆ ಮಾಡಿಯಂಡಿಂಜತ್. 1922ಲ್ ಬಿಷಪ್ ಕಾಟನ್ ಸ್ಕೂಲ್ಂಜ ಪಾಸಾಯಿತ್ ಡೆಹರಾಡೂನ್ ಪಿನ್ ಆಫ್ ವೇಲ್ ರಾಯಲ್ ಇಂಡಿಯನ್ ಮಿಲಿಟರಿ ಕಾಲೇಜ್ ಕೂಡಿತ್, ಇಂಗ್ಲೆಂಡ್ ರ ಸ್ಯಾಂಡರ್ಬರ ಉನ್ನತ ಸೇನಾ ತರಬೇತಿಕ್ ಆಯ್ಕೆಯೂ ಆಚಿ. ನಾಲ್ ಕಾಲ ಬಲ್ಯ ಮಟ್ಟತ್ ಟ್ರೈನಿಂಗ್ ನಲ್ಲ ಸಾಧನೆ ಮಾಡಿತ್ ಎಲ್ಲಾತಲೂ ಮುಂದಾಯಿತ್ ತಾಂಡ 20ನೇ ಬಯತ್ಲ್ 1926ಲ್ ಇಂಗ್ಲೆಂಡ್ ಸೆಕೆಂಡ್ ಲೆಫ್ಟಿನೆಂಟ್ ಪದವಿಕ್ ಆಯ್ಕೆಯಾಯಿತ್ ರಾಯಲ್ ಇಂಡಿಯನ್ ಆರ್ಮಿಕ್ ಕೂಡ್ಚಿ. ಜ.ತಿಮ್ಮಯ್ಯ ಕ್ರೀಡೆಲ್ ಹಾಕಿ, ಕ್ರಿಕೆಟ್, ಕತ್ತಿವರಸೆ ಅಲ್ಲತ ಶೂಟಿಂಗ್, ಕುದರೆ ಸವಾರಿ ಎಲ್ಲಾತಲೂ ನಲ್ಲ ಪ್ರತಿಭೆ ಕಾಟಿಯಂಡಿಂಜತ್. ಸ್ವಾತಂತ್ರ್ಯ ಚಳವಳಿಕ್ ಕೂಡುವಕ್ ಗೇನ ಮಾಡ್ನ ಜ. ತಿಮ್ಮಯ್ಯ ಬಯ್ಯಂಜಿ ಅದೇ ಪದವಿಲ್ ಮಿಂಚಾಕ್ ಪೋಚಿ. 1934ಲ್ ಕೋದಂಡ ಕಾರ್ಯಪ್ಪಂಡ ಮೋವ ನೀನಾನ ಜ.ತಿಮ್ಮಯ್ಯ ಮಂಗಲಾಚಿ. 1935ಲ್ ಕ್ಷೆಟ್ಟಾ ಕಾಲೇಜ್ (ಇಕ್ಕತ್ತರ ಪಾಕಿಸ್ತಾನ) ಸಿಬ್ಬಂದಿ ಕಾಲೇಜ್ ಅಧಿಕಾರಿಯಾಚಿ. 1937ಲ್ ಕ್ಯಾಪ್ಟನ್ ಪದವಿಕ್ ಏರ್ಚಿ. 1939ಲ್ ದಂಡನೆ ಮಾಪಡೆ ಸುರುವಾನ ಸಮಯತ್ ಜ.ತಿಮ್ಮಯ್ಯ ಸಿಂಗಾಪುರಕ್ ಪೋಚಿ. 1942ಲ್ ಆಗ್ರಾತ್ ಸೇವೆಲಿಂಜತ್. 1944ಲ್ ಭಾರತತ್ ಬ್ರಿಗೇಡ್ ಕಮಾಂಡರ್ ಆಯಿತ್ ಸಾಧನೆ. 1945ಲ್ ಬ್ರಿಗೇಡಿಯರ್ ಪದವಿಕ್ ಏರ್ಚಿ. 1947ಲ್ ಸ್ವಾತಂತ್ರ್ಯ ಸಮಯತ್ ಇವು ಬ್ರಿಗೇಡ್ ಕಮಾಂಡರ್ ಆಯಿತಿಂಜತ್. 1948ಲ್ ಜೋಜಿಲಾ ಹಿಮ ಕುಂದ್-ಕಣಿವೆಕ್ ಪೋಯಿತ್, ಪಾಕಿಸ್ತಾನರ ವಶತ್ಲ್ ಇಂಜ ಕಾರ್ಗಿಲ್ ವಶ ಪಡ್ತಚಿ. ಸೇನೆರ ಬಲಕ್, ಸೈನಿಕಂಗಡ ರಕ್ಷಣೆ, ಕ್ಷೇಮಕ್ ಜ.ತಿಮ್ಮಯ್ಯ ಮಾಡ್ನ ಕ್ರಮ, ರೂಪಿಚಿಟ್ಟ ಯೋಜನೆ ದುಂಬಾ ಪರಿಣಾಮಕಾರಿಯಾಚಿ. 1950-1951ಲ್ ರಾಷ್ಟ್ರೀಯ ರಕ್ಷಣಾ ಅಕಾಡೆಮಿರ ಕಮಾಂಡೆಂಟ್ ಆಚಿ. 1953ಲ್ ಲೆಫ್ಟಿನೆಂಟ್ ಪದವಿ ಪಡ್ಂದತ್. 1954ಲ್ ಕೊರಿಯಾ ದೇಶತ್ ಇವು ಮಾಡ್ನ ಸಾಧನೆಯಿತ್, ಭಾರತ ಸರ್ಕಾರತ್

'ಪದ್ಮಭೂಷಣ' ಗೌರವ ಪಡ್ಂದತ್. 1956ಲ್ ಜನರಲ್ ಆಫೀಸರ್ ಕಮಾಂಡಿಂಗ್ ಚೀಫ್ ಆಚಿ. 1957 ಮೇ 8ಂದ್ ಪ್ರಧಾನ ದಂಡ ನಾಯಕ ಆಯಿತ್ ಅಧಿಕಾರ ವಹಿಸಿಯಂಡತ್. ದೇಶ ವಿದೇಶ ಮಟ್ಟತ್ ಸೈನ್ಯಪಡೆರ ಮಾರ್ಗದರ್ಶಕಂಗಳಾಯಿತೂ ಸೇವೆ ಮಾಡ್ಚಿ. 1960ಲ್ ಜ. ತಿಮ್ಮಯ್ಯ ಅಖಿಲ ಭಾರತ ಕ್ರೀಡಾ ಕೌನ್ಸಿಲ್ ಅಧ್ಯಕ್ಷನಾಚಿ. ಅಲ್ಲಿ ಪರ್ವತಾರೋಹಣ (ಕುಂದ್ ಪತ್ತ್ವ), ಕುಂದ್ಂಜಿ ಪಾರ್ವ ಇನ್ನತ ಸಾಹಸ ಕ್ರೀಡೆಕ್ ಕ್ಲಬ್ಬ್ ಸ್ಥಾಪನೆ ಮಾಡ್ಚಿ. 1961 ಮೇ 7ಂದ್ ಜನರಲ್ ಪದವಿಂಜ ನಿವೃತ್ತಿ ಪಡ್ಂದತ್. 1962ಲ್ ದಕ್ಷಿಣ ಭಾರತ ಪ್ಲಾಂಟರ್ಸ್ ಅಸೋಸಿಯೇಶನ್ ರ ಉಪಾಧ್ಯಕ್ಷನಾಚಿ. 1964 ಜುಲೈಲ್ ಸಂಯುಕ್ತ ರಾಷ್ಟ್ರತ್, ಶಾಂತಿ ಪಡೆರ ಮುಖ್ಯಸ್ಥನಾಯಿತ್ ಸೈಪ್ರಸ್ ಸೇವೆ. 1965 ಡಿಸೆಂಬರ್ 18 ಂದ್ ಸೈಪ್ರಸ್ ಜನರಲ್ ಕೆ. ಎಸ್. ತಿಮ್ಮಯ್ಯ ಹೃದಯಾಘಾತತ್ ಮರಣ ಪಟ್ಟತ್. ಬೆಂಗಳೂರ್ ವಿಲ್ಸನ್ ಗಾರ್ಡನ್ ತೂಟಂಗಳತ್ ಜ.ತಿಮ್ಮಯ್ಯಂಡ ದಫನ. 1997 ಡಿಸೆಂಬರ್ 18ಂದ್, ಬೆಂಗಳೂರ್ ವಿಲ್ಸನ್ ಗಾರ್ಡನ್ ತೂಟಂಗಳತ್ ದಫನ ಮಾಡಿತಿಂಜ ಜ. ಕೆ.ಎಸ್. ತಿಮ್ಮಯ್ಯಂಡ ಚಾವುನ ಪೂರ್ಮ್ ಎಡ್ಡಿತ್ ನಗರತ್ ಆರ್ಮಿ ಸರ್ವೀಸ್ ಕಾರ್ಪ್ಸ್ (ಎಎಸ್ಸಿ) ಸೆಂಟರ್ಲ್ ಸಮಾಧಿ ಮಾಡ್ಚಿ.

1965ಲ್ ಸೈಪ್ರಸ್ ಲಾರ್ನಕಾ ಮುಖ್ಯ ರಸ್ತೆಕ್ 'ಜ. ಕೆ. ಎಸ್. ತಿಮ್ಮಯ್ಯ ರಸ್ತೆ' ಂದ್ ಪೆದ ಬೆಚ್ಚಿತ್ ಪಿಂಚಾ ಟರ್ಕಿ ದೇಶತ್ ರ ಮುಖ್ಯ ರಸ್ತೆಕೂ ತಿಮ್ಮಯ್ಯಂಡ ಪೆದ ಬೆಚ್ಚಿತ್. 1966 ಜೂನ್ 6ಂದ್ ಸೈಪ್ರಸ್ ಜನರಲ್ ಕೆ. ಎಸ್. ತಿಮ್ಮಯ್ಯಂಡ ಗೌರವಕ್ ಸ್ಟಾಂಪ್ ಬುಡ್ಗಡೆ ಮಾಡ್ಚಿ. 1972ಲ್ ಮಡಿಕೇರಿ ಟೋಲ್ ಗೇಟ್ ರ ಸರ್ಕಲ್ ಜ. ತಿಮ್ಮಯ್ಯಂಡ ಆಳ್ವೆತ್ತರತ್ ಪ್ರತಿಮೆ ಬೆಚ್ಚಿತ್. ಡೆಲ್ಲಿ, ಆಗ್ರಾ, ಅಮೃತಸರ, ಮೈಸೂರ್, ಬೆಂಗಳೂರೂ ಇಯಂಡ ಪೆದತ್ ರಸ್ತೆ ಉಂಡ್. ಮೈಸೂರ್ ನಲ್ಲ ಬಡಾವಣೆ ವಿಜಯನಗರ ದಂಡನೆ ಸ್ಟೇಜಲ್ ಮುಖ್ಯ ರಸ್ತೆಕ್ ತಿಮ್ಮಯ್ಯಂಡ ಪೆದ ಉಂಡಲ್ಲತೆ, ಇದೇ ರಸ್ತೆಕ್ ಮೈಸೂರ್ ಕೊಡವ ಸಮಾಜ ಉಂಡ್. 1988ಲ್ ಬೆಂಗಳೂರ್ ರಿಚ್ಚೆಂಡ್ ಸರ್ಕಲ್ಂಜಿ ಕೇದಕ್ ಎಂ ಜಿ ರಸ್ತೆಕೆತ್ತಣೆ ರಸ್ತೆಕ್ ಜನರಲ್ ಕೆ. ಎಸ್. ತಿಮ್ಮಯ್ಯ ರಸ್ತೆಂ ಪೆದ ಇಟ್ಟಿತ್. ಸಿಂಗಾಪುರತ್ ಮೂಸಿಯಂ ಒಂದಾಲ ತಿಮ್ಮಯ್ಯಂಡ ಮೇಣತ್ ಪ್ರತಿಮೆಯೂ ಉಂಡ್. ಮಡಿಕೇರಿಲ್ ಇದಿಕ್ಕ ಪುದಿಯದಾಯಿತ್ ಸ್ಥಾಪನೆ ಮಾಡ್ನ ಆಸ್ಟ್ರೋ ಟರ್ಫ್ ಹಾಕಿ ಪರಂತ್ ಜನರಲ್ ತಿಮ್ಮಯ್ಯ ಪೆದ ಬೆಚ್ಚಿತ್. ಕೊಡವ ಸಮಾಜ ಒಕ್ಕೂಟಕಾರ, 2006 ಏಪ್ರಿಲ್ 7 ಂದ್ ಮಡಿಕೇರಿಲ್ ಜನರಲ್ ಕೊಡಂದೇರ ಎಸ್. ತಿಮ್ಮಯ್ಯಂಡ ನೂರಾಂಡೆತ್ ಪುಟ್ಟ್ನ ನಮೆನ ಮಾಡ್ಚಿ. 2006ಲ್ ಮಡಿಕೇರಿಲ್ ಜನರಲ್ ತಿಮ್ಮಯ್ಯಂಡ ಮನೆ ಸನ್ನಿಶೈಡ್ನ 'ಜ.ತಿಮ್ಮಯ್ಯ ಮೂಸಿಯಂ' ಮಾಡ್ವಕ್ ಸರ್ಕಾರ ಪ್ರಕಟಿಚಿಟ್ಟಿತ್.